

童山詩集  
一





童山詩集

(一)

李調元撰

# 童山詩集序

天下之理常順而文章恆以逆而成。水之就下。勢則然也。風撓之。石椅之。迴曲而紋生。激盪而瀾汎。其蹙縮複疊。必有奇峯峭岫。出乎其間。是殆文章之示象也乎。士生早掇科第。取富貴。終其身。偃仰廟廊。發爲詩文。玉節而金和。宜爲世楷則矣。徐按其中。則體勢平易。雖紆徐淡衍。求其感動人之心魄。欲置不能者。罕矣。蓋境順則氣順。奇峭之思。無由振刷以出也。吾友李君雨村。生義眉秀異處。卓犖自負。於書無所不讀。發爲詩歌。嶽峯磊落。肖其爲人。弱冠中乙科。三十而成進士。授庶常。旣而改官文選主事。君素不好吏事。獨以翰林爲易讀書。旣不得以此終。則又往往以詩自雄。雖悲詫不形。然其中鬱折往復之致多矣。歲己丑。遭尊人石亭先生大故。先生爲北路同知。攝密雲事。其歿也。雖由疾病。亦有憂患迫之使然者。雨村力疾居喪。摒擋後事。艱難恒悼。半載之間。得詩二百餘首。皆以寫其悲哀靡訴之情。余三復其詩。泫然閔然。而告之曰。合觀全集。大矣美矣。而就其大指論之。改官後工於翰林時。近作則又工於改官時。非所謂逆則成文。非有無慆不平。卽不能出奇以驚世者耶。雨村亦相視而笑。以余爲知言。嗟乎。余之好爲詩類雨村。而處境拂逆。視雨村尤甚。顧余詩多平易近情語。遠不逮雨村。是則撓之椅之。蹙縮複疊。而不能成文。亦天性所限然也。余方將請假南歸。雨村亦於秋杪歸蜀。因爲序其詩以志別。昔東坡答王定國寄詩。深美其藝之進。而云窮人之具。將以交割與公。余於雨村亦云然矣。己丑夏四月新安愚弟程晉芳序。

# 童山詩集卷一

綿州李調元雨村

## 戊辰

### 雜興

衣冠入保國。相驚以爲怪。繩彼以禮文。其苦如縲械。人固安所習。改鑄終不愛。假使我輩保。豈復成人類。陶人使爲冶。鑄器必不良。冶子使爲陶。瓦合必相妨。茅茨與土堦。後王無此殿。玉杯與象箸。前王無此宴。所以古聖人。因時隨俗使。

人身一小天。天道固難曉。五官不列眉。眉胡主壽考。百體不止面。面胡獨要好。須胡分男女。乳胡分大小。耳目胡不倍。手指亦可少。何不去閒毛。亦可添牙爪。天道多遺憾。何況人身藐。自身尙不知。安用叩蒼昊。所以性理書。徹底未明了。

楚王愛細腰。餓死了不畏。太真號肥婢。臨死猶涕淚。無鹽入齊宮。轉取人所棄。昭君在漢室。反使走胡地。有愛眇目者。反怪雙目備。有愛半面者。轉笑全妝累。人情好女色。愛憎亦多異。無怪歷代來。忠姦互倒置。佛氏談因果。來世生福地。幾見初生人。盡記前生事。老子稱太上。長生應在世。何以血肉軀。飛昇不見墜。

吾儒慎追遠。禮重宗祖祭。追封拜墳頭。安知魂果至。人睡言小死。所異在無氣。如與睡真同。死亦可不淚。鵲巢而鳩居。皆謂鳩不如。然亦各有長。未可定贏輸。鵲固善營造。鳩亦善生雛。無巢身可寄。無子室空虛。一乳鳩子七。問鵲可能乎。

牧童有何道。黃帝拜問之。項橐有何知。仲尼以爲師。劍必敵萬人。乃可試其利。詩必參百家。始免後人議。自以爲是者。安望傳後世。

斥鷃爲鵬笑。所爭九萬里。使鵬穿叢林。或恐不如雉。蜉蝣避雨遷。苦爲龍所使。令龍穿曲珠。或恐遜於蟻。物固各有宜。不必兩皆美。猿猱善登山。鷗鳬工涉水。長笑土木偶。相爭兩非是。

驪龍伏九淵。誰敢攫其胡。愚夫遭其睡。乃得領下珠。鷗鳬居海上。日與人相嬉。智者謀獲之。一去不復隨。失者多由智。得者多由愚。

偶聞人不潔。無不爭掩鼻。不知五穀生。皆自糞壤出。偶見兒啼聲。無不厭且瞋。不知百年人。俱自孩提成。流芳須百世。前愆乃可蓋。遺臭萬年者。恐不如兒輩。奈何逐臭夫。紛紛史策內。

遊山

遊山如讀書。一里當一葉。山行數百里。日與異書接。坐令書卷氣。充腹復浮頰。吐出遊山詩。清若風生脅。人言我看山。胡不攜卷帖。雲烟供染翰。初不借鼓篋。不知讀書人。內外同涉獵。山乃外之書。奇文各領懣。書乃內之山。插架仰重疊。內外皆有書。何用書自挾。善讀卽善遊。理不隔眉睫。譬如多金人。飽載馬駝蹶。

豈在露財寶。豈不妨盜劫。君莫笑出門。外書趨蹌蹌。君莫笑閉戶。內山恣漁獵。君看萬卷樓。只作萬嵯峨。

蜀樂府十二首

荷池引

爲蜀王近侍嚴蘭珍也。蘭珍。華陽人。父椿茂。邑諸生。蘭珍工書法。年十六。與同邑齊飛鸞。許若璩。李麗華。同選入宮。甲申十一月。賊攻城急。蘭珍投西院荷池死。

銀塘昨夜芙蓉泣。錦城將染黃巢血。一聲鼙鼓動地來。滿宮粉黛無人色。妾家華陽絕世姝。豆蔻花梢二月初。曾侍吾王供酒翰。肯教辱賊佐校書。塵土蔽天血流水。惟有荷花嚼無滓。誓將亭亭不污身。對花先向王前死。池水漣漣今幾春。夜夜秋風吹白蘋。香魂雖杳遺墨在。隻字珍於魏夫人。

御溝怨

爲齊飛鸞也。甲申十二月朔。王同周貴妃自經端和殿。飛鸞躍入御溝死。是時又有成都王至潯。至潯。同日投宮中八角井死。

羣豬進城城甫閉。城頭大呼屠伯至。紛紛宮女出王宮。鼠竄不復分雌雄。蜀王已縊端和殿。貴妃從死色不變。八角井中二王殉。又見御溝鐵女人。鐵女人。是何名。齊飛鸞面如生。可憐身死名不死。人傳姓氏留青史。向來奔出誰家女。

銀瓶擊

爲許若瓊也。王薨之日，賊入宮僭據，逆闔王官執瓊獻賊，僞封皇后。夜半宴寢宮，呼瓊侍酒，酒酣瓊執席上銀瓶擊獻賊額，賊大怒，戕瓊右臂。瓊以左手搏賊，賊又戕左，罵不絕口。賊衆憚之，破車轟轟城門開，賊如虓虎四門來，黑雲壓頭，洒紅雨，哭聲震天門已啓。此時阿瓊在何地，別藏荊軻抱仇志，宮中歌舞夜偏長，恨無匕首乘賊睡，席上銀瓶當利刀，一瓶擊去腦流膏，賊大悲，羣賊至刀兵齊下，截兩臂，雖折兩臂終完名。今日方知許飛瓊。

漢殿仙

爲李麗華也。麗華幼慧，父友許寬義嘗以吳江月令對華，應曰：漢殿秋。其家因呼爲漢殿仙。賊旣破蜀宮，幽鎖密處，華絕粒五日不死。十二月六日，吞金卒。年甫二十歲。以上見遂寧張氏闡幽錄，亦輒聞也，故歌以紀之。

天上結璘奔月女，降下人間作妃子。曾從廣寒宮裏生，誓向逆賊營中死。赤眉去，黃巾來，金粟茹，玉顏頽。地下旣無乾淨土，仍奔月窟上天去。

老神仙

爲陳士慶作也。鄧州人，初爲塑匠，自言從終南山道士授禁方四頁，能爲人接骨續肢，無不神效。曾爲孫可望接活美人，又活白賊養子。賊中皆呼爲仙。獻賊有愛婢曰老脚，能掌文書，誤刃洞見臍腹，命醫之，七日而活。賊喜，疊几爲臺，使登几頂，令衆羅拜，封爲老神仙。賊誅後，從李定國至平

越病死。蜀人劉文季蒞親見之。屬方邵村亨咸爲記。因歌之。

我聞神仙愛官職。不聞神仙亦從賊。何來塑匠亦稱仙。公然與賊爲賓客。自言曾到終南山。乞得仙書洞裏還。中有禁方纔四頁。接骨換肢呼吸間。不知何時賊兵至。擄在營中作醫士。簣中已起孫美人。陣上又活白兒子。三千粉黛列如雲。就中老脚能掌文。無端遷怒刃傷腹。洞見肝腸賊欲哭。呼聲一片傳仙至。莫謂我刃鋒不利。半夜纔敷白水膏。平明依舊紅妝侍。從此賊聲歡沸天。築臺羣拜老神仙。萬几疊梯高不墜。老神仙名天下傳。如此名醫不醫國。却去賊中醫首賊。我欲殺仙報蜀仇。惜哉仙死賊亦殲。

### 狗皮道士歌

狗皮道士不知姓名。以乞匄爲生。嘗着狗皮。學狗吠。故名。每侮獻賊。賊入成都。嘗攔馬作狗吠。賊怒。以刀斫之不入。彎弓自射之。反中賊馬。賊遂避之。元旦。賊僭登殿受朝賀。忽見道士狗皮執笏立班中。令人縛至。道士作狗吠。則城中狗皆吠。吠聲震天。對面不聞人語。賊乃退。道士亦不見。陳定九鼎曾爲作傳。

狗皮道士不知名。以皮爲衣。狗爲聲。乞食成都。偶一吠。城中百犬皆吠。驚。忽聞獻賊前。驟至。突向馬前作狗吠。賊怒。彎弓射不入。反中賊馬。立斃。是時獻賊僭稱皇。百官拜賀如朝堂。忽見道士立班內。狗皮執笏隨班行。獻賊由來狗天子。一時百官狗而已。道士以狗爲談諧。反借狗皮整綱紀。嗟乎。狗皮尙把賊爲戲。豈有人皮反畏避。君不見驅賊入蜀楊嗣昌。人皮不若狗皮良。

青羊宮

傷蜀士也。賊詭稱開科。用軍法發遣。後至者誅。及至。盡殺於成都西門外青羊宮。凡二萬二千三百人。筆硯堆積如山。又開武科。取狀元張大受。寵賜無比。三日。闔門盡誅。

文人怪事竟至此。二萬秀才同日死。宮中筆硯堆如山。門外浣溪血成水。玉石不分盡遭戮。若比焚坑禍尤酷。卽今元氣雖復還。天黯猶聞酸鬼哭。富貴如浮雲。儒冠解誤身。君不見當時狀元張大受。三日榮華萬年臭。

兩橫行

誰家兩橫橫閭里。一橫肆行一橫恥。冤家狹路忽相逢。血流五步常場死。君子見李熊爲盜鄴中豪。轉禍爲福官職高。又不見韓信能受跨下辱。終拜王侯享大祿。丈夫只宜五鼎食。何須五鼎烹。朝廷所需正爾輩。安用爲人報不平。方今四海正清宴。寶刀不用明如電。三橫變作一忠臣。昔年周處是何人。

囑嚕曲并序

頌黃制軍也。囑嚕本音國魯。蜀人呼賂錢者。通曰囑嚕。皆作平聲。如曰辜奴。行常帶刀。短曰線雞尾。長曰黃鱗尾。皆象形而名。內分紅黑。晝曰紅錢。如剪綵割包之類。夜曰黑錢。如穿牆鑿壁之類。或三五成羣。或百千成黨。少則劫奪孤旅。多則抗拒官兵。蜀中爲害莫此爲甚。非斬草除根。久必蔓延。公名廷桂。漢軍。自公制蜀。此輩斂跡。及去。無不望公再來也。

黃鰓長線雞短。青天白日兵戈滿。黑錢去。紅錢來。山橋野店雞犬哀。殺人不償命。皆冒古名姓。夜來假面劫鄉民。平明縣堂充保正。刀爲益州劍爲閹。天胡不將此輩戮。安得再來關內侯。盡使帶牛兼佩犢。

### 鳥生八九子

鳥生八九子。啾啾鳴樹巔。一子始能飛。遶樹爲翩翾。衆子妬先達。叨啁進謗言。老鳥中先入。不使棲巢間。一朝不知處。沒入青雲端。衆子怒且言。不報養母恩。那知日復日。衆子不踐言。有翼生我身。各各爭鵬搏。東西紛飛盡。年深竟不還。空餘枝上巢。風雨日摧殘。老鳥在其間。悲鳴饑號寒。朝來一鳥過。視之心爲酸。饑爲哺蟲食。寒爲蔽羽翰。乃知是前子。終始戀本根。當年倘不去。寧得身膚完。雖然母有託。坎坷多憂患。嗚呼八九子。鳥生良實難。

### 拉馬行

客行至縣城。城外聞拉馬。云奉上官票。行裝且須下。縣堂擊鼓點馬夫。縣官排衙吏傳呼。里正如狼差如虎。馬瘦如狗。客如奴。富客競輸錢。汝馬暫免牽。貧客無錢聊守坐。公文急迫當忍餓。却看驛馬肥於羊。沙眠草嚼自徜徉。借問此馬誰所韉。但云官府出門用。

### 圈墳嘆

松柏鬱鬱中有墳。豐碑隆穹高南村。朝來不知誰氏子。置莊恰恰鄰墓門。子孫雖貧基宅在。寧肯將墳當田賣。眼着地面屬他人。不許麥孟親灑拜。道逢官府牽衣哭。官解長繩一丈足。縱橫十字套爲圈。圈出不

許後人贖君不見寒食家家上冢時。烏鴉銜肉啼高枝。烏有母兮枝有本。君家亦有冢累累。

上之回

上之回。自秦雍。雲君岳祇海工。瀆伯厥靈來同。百神駢集太乙覬。翠羽金支闔竹宮。上乃南觀神洲。北眺芒嶺。東臨瀾滄。西望舊澧。龍光日浴。迨紫舌黃支。頭飛鼻飲。咸追風駕霧以朝東。星斗交羅。光燭燭。瞻雲就日來何從。上不回兮心方忡。上之回兮樂無窮。

巫山高

巫山高。高入雲。雲中十二峯。五色何氤氲。琪花玉樹紛難詳。遙見碧城開天間。黃金爲門白玉牆。中有雲鬢明月璫。含情弄態如相望。亦猶藐姑射山旁。飄飄似仙雲中翔。陽臺何山無斜陽。爲雲爲雨山之常。底事誣山誣襄王。

烏夜啼

團團桐陰綠窗開。香閨少婦臨妝臺。昨夜夢見征人回。枝枝寒鳥啼不已。兩情未訴忽驚起。玲瓏亂落淚珠子。問烏知郎歸不歸。啞啞似不管是非。恰欲打烏烏已飛。

猛虎行

采薇于山。日暮苦饑。猛虎當道。我不得歸。一解再拜涕泣。黃鰓骨立。膏粱之家。而胡不食。二解虎曰啞啞。所忌爾輩。腐鼠何校。鬼攝其氣。三解我則已矣。毋爲狐媚。南山之南。馮婦且至。四解

來日大難

來日大難。馬瘦衣單。出門何所之。撲面風沙寒。道逢故人。相對無語。車驅竟去。泣涕如雨。高軒騶馬去者。誰。昔年破屋聲。嗷。我若乘車。君戴笠。他日相逢。任君揖。

少年行

馬蹀躞。車轆轤。紛紛陌上人相逐。誰家白面年少郎。翩翩侍從紫遊韁。身列羽林建牙纛。臨門檠戟生輝光。人生富貴何足羨。過眼豪華倏飛電。翻雲覆雨事何常。生死炎涼一朝變。君不見郭外紫綵何代墳。白楊千尺噪鴉翻。誰人昨拜千鍾祿。還向墳前起大屋。

子夜四時歌四首

妾心如柳樹。郎心似楊花。柳樹長在戶。楊花不在家。纖手弄團扇。念歡不住口。團扇妾不離。妾已棄君手。天上會牛女。明日仍間隔。如何妾與郎。不及會七夕。郎從西北來。團鑪暫相戲。願郎心常溫。莫改寒時意。

竅木謠

竅木竅木。風從中出。笙簧笙簧。言從口揚。竅木尚有因。笙簧不可當。初或疎兄弟。漸乃離爺孃。嗟乎。曾參殺人母反走。古今間人只在口。

艾如張

雙鳬俱飛欲歸稻池。道逢繳弋傷我胸臆。鳴鼓澤中不知何處。張弓視鳩。雄雞飛去。

雨霽懷明經計寧邦萬安

夜涼如水平池。倚檻思君君不知。雨漲江頭聲頃洞。風篩潭面影褸褸。幽人祇愛觀周易。名士原須讀楚詞。種菜閉門非我事。秋來折桂定相期。

苦雨行

雲滃深林色如墨。勃鳩呼婦林間匿。倏爾狂風捲地來。箕笠無功雨似織。憶昨蘊隆黑蜨凝。共禱田神火蜺騰。盆中蜥蜴擊欲死。龍無點滴救生植。邇來天漏誠有之。媧皇不補聽其缺。田禾皆作浮萍飄。禹王何以畫溝洫。陰陽在天雨有數。社鬼毋乃失其職。我雖無田耕石硯。亦有破屋遮寢息。書生一命本螻蟻。徒穴返遜微物識。願天憫此菜色民。撥雲一露青天色。我雖餓芋亦何憾。免使窮簷戴盆泣。

雨夜和郭秀才有聲韻

晚來驟雨忽翻盆。悶向糟邱倒一尊。正憶高人居北郭。忽回素友到南村。論詩務使陳言去。酌酒空餘舊釀存。洗淨鉛華出新穎。天公此雨不無恩。

計寧邦送木筆盆花

名花結構出天工。蟠就辛夷最鬱葱。作筆他年青澹墨。奪朱此日惡殷紅。王維館裏知誰到。杜甫詩中落

已空。獨有好奇老居士。縛毫不令放東風。

雨過寧邦。覓花歸。栽江漲不得渡。憩曹錫寶妹丈久待。乃得濟。暮歸爲作長句。

颺風驟雨。聞拔木。雷聲萬竅顛坑谷。川河忽作汴河黃。一瀉滔滔無九曲。我辭主人整歸轡。奚童担花紅滿肩。臨流欲渡不得渡。烟紅獨立何茫然。桄木林前柳堤畔。扣門曹子置高宴。飯罷頻遣佃人看。猶報洪濤平兩岸。須臾垂龍收雨回。杞柳津邊船始開。一葉飄飄出復沒。風波堆裏如飛來。渾身衣裳濕如洗。歸對妻孥眞夢耳。急草新詩代招魂。不覺亟稱水哉水。

苦雨二首

如籠小屋似雞埕。又與鳴蛙共一池。老僕披簑煎蟹眼。諸昆著屐擁臯比。移家處處還同蛭。毀室翹翹祇恨鷗。市釀不須嫌味薄。醉來亦足舞僛僛。

彫零梧葉井成堙。竈不聞炊歎濕薪。寒到緼袍慙季路。饑無棠栗憶陳臻。芭苴搖去輕如扇。荇菜飄來嫩似蓴。却看園花無賴甚。胭脂抹得更鮮勻。

喜晴二首仍用前韻是日遲蔣劉二生未至

失晨雞啼尙於埕。早見晴雲落曉池。簷影三磚眠野老。履聲一路響隣比。□□梅雨斑書簾。陣陣花風點酒鷗。月色定知今夜好。舉杯准擬舞僛僛。

剪除藤架使通堙。閒看兒曹拾斷薪。開徑祇應來蔣翊。出門竟欲訪劉臻。荅溪客至烹紅鯉。縣竹人來饋

意山詩集 卷一 戊辰

白晝數日園林泥不到。幾竿新綠粉初勻。

# 童山詩集卷二

己巳

鹿頭關謁龐靖侯墓祠內並祀武侯

江鎖雙龍台。關雄五馬侯。益州如肺腑。此地小咽喉。事急爭雞口。時平失鹿頭。至今松柏冢。風雨不勝愁。誰言此州小。曾有鳳雛來。首獻三條計。洵非百里才。生無慙驥足。死合遣龍陪。一自星飛後。千山澗水哀。

漢大司農秦宓故里

官本司農秩。人呼祭酒村。兩朝天有姓。三造地無存。城郭綿江浸。人家洛漲痕。永安遺命日。應愧此中魂。

過新都謁楊文忠公石齋先生及文憲公升菴先生墓有感議大禮事爲作長歌

備禮乃成體。嘉靖不信前制禮。考書乃知初。嘉靖不讀前史書。武宗前星旣失耀。兄終弟及下明詔。旣難隔代考。孝宗又難二統逼武廟。一時議禮集朝堂。俱守定陶與濮王。請考孝宗叔興獻。皇帝曰。弗朕心傷。獨有待對一舉子。不與漢哀宋英比。請考興獻伯孝宗。皇帝曰。愈朕心喜。可憐衆君子。不敵一小人。新都朝去位。永嘉夕輔臣。大禮未成大獄起。撼門慟哭在此舉。牽裾首輔爲罪魁。遣戍百人子居始。濮議諸臣旋賜環。惟有金齒終不旋。至今文忠及文憲。豐碑終見高遺阡。閱五百年國已更。事久聊作平心論。天下

豈有無父人。况爲天子亦有親。與獻既爲天子父。忍使其父爲子臣。漢宣不皇父。亦嘗考皇孫。光武不皇父。亦嘗考南頓。既考與獻卽當皇。亦猶王季同文王。邨王昔稱景泰帝。懿文亦得爲康皇。譬如遙除官。不過追贈諡。但當曲體罔極私。無預朝廷大名器。所恨考與獻。則疑前無孝。並嫌皇與獻。則疑躋武廟。不得世宗延其嗣。反名獻皇亂統號。舉朝所以共沸騰。百官所以愈暴謀。世宗亦乏錫類仁。錮如元祐諸黨人。總尊等輩何足責。只爲功名臭萬春。臭亦難悉數。豐坊又踵武。嚴嵩附和號睿宗。議禮又用李林甫。

雙桂堂楊升菴故宅卽今廳署雙桂殆補植也

留耕家世福雙全。豈料人關酒亦關。仕宦從來真傀儡。家山何處望團圓。青蛉夢斷啼鵲易。金雁魂歸化鶴難。果有堂前雙桂否。丹心丹桂定俱丹。

平定金川恭紀八首并序

乾隆己巳十三年十一月癸丑。上命大學士傅恒爲經略。督師赴金川軍營。十四年正月初四。金川蠻酋莎羅奔郎卡率衆投降。奏聞。上命班師。二月丁巳還朝。庚午瀛臺賜宴。封經略大學士傅恒忠勇公。提督岳鍾琪封三等威信公。

蠶叢天險控西隅。雜谷羌夷種落殊。回鶻未通唐職貢。冉駝終入漢輿圖。連年議撤金城戍。此日重開玉塞圖。聖世羈縻有深意。諸戎甘自觸天誅。

繩橋牽複正懸兵。帶索牽援絕嶺行。石壘堅旃蛇有影。碉房吹角鴈無聲。卽川雪霽姜維廟。爐水烟生孟

獲城。眼見旄頭天際落。窮荒極目瘴雲平。

羽書飛騎接長安。燧道縈廻路百盤。誰使行軍殊細柳。遂教對簿緩樓蘭。常年構怨哀鍾鄧。謂訥親張廣泗。此口同謀憶范韓。聞道軍前方賜劍。應知國法總難寬。

何須小醜刻師期。自有高牙樹月支。十路不需諸葛扇。百蠻爭避岳家旗。寒侵虎帳傳餐早。霧暗龍堆出探遲。何處金笳聲倍壯。元戎早報獲酋夷。

捲甲銜枚度雪山。重兵振旅入荒蠻。軍聲欲壓沈犀驛。虜膽先寒倒馬關。洗甲營前星燦燦。受降門外月彎彎。廟堂早建凌烟閣。佇待元戎奏凱還。

非關狡窟計終窮。原有懸弧在掌中。日落紅崖森壁壘。風高黑水聚艤艣。火驢已見樓梯破。流馬何愁棧閣雄。便築三城當絕域。降王萬里使車通。岳公奏准由蕭壩水陸並進。金酋畏懼乞降。

妖狐伏處望嵯峨。無復征騎鳥道過。已見金戈清大漠。還聞玉斧畫沙河。張騫槎上葡萄少。馬援囊中薏苡多。從此白狼應入貢。好將朱鷺譜饒歌。

千載聲威感白題。九霄相率上丹梯。垂楊綠到花卿廟。市杖青連竹女溪。外譯初嘗郫縣酒。內蠻先獻普州梨。陽關守吏如相問。家在邛崃西復西。

### 綿州越王臺故壘

生爲磊落人。復遊磊落州。不見越王臺。但見清江流。當年唐帝子。錫土守此邱。美人捲珠簾。笙歌夜未休。

鳴鸞忽能舞。江山生暮愁。惟有江邊月。曾照城上樓。杜少陵詩。綿州州府何磊落。陸放翁詩。磊落人爲磊落州。

由白塢瀾渡東津

出郭眇遙岑。過渡得佳境。長風走溪聲。落日橫塔影。入林路愈細。村日光耿耿。髣髴別有天。鷄犬自閭井。不見打魚人。但見釣魚艇。

自東津步至西澗

烟霞何重疊。草樹復葱蒨。出澗聽萬籟。入谷駭百變。犬吠隔林聞。鳥啼深竹見。懸崖暮樵出。細逕歸僧慣。道心觸幽洞。孤詣超清院。獨往雖暫歡。多累恐寡便。濯足洗塵心。庶脫流俗牽。

遊富樂山

但覺林巒密。不知烟霧重。緩步入修竹。夾道吟長松。細鱗漾深澗。矯鶴盤蒼穹。遙指精舍好。遂登最高峯。當時龍戰野。此地等蒿蓬。富樂獨入眼。方知使君雄。事歷千年劫。空餘一畝宮。惟有古源泉。日夕鳴悲風。

由富樂禪林至西山觀宿

微風水際來。不覺山色暝。遙望檜栢林。遂上杉蘿逕。禪榻殊清冷。空齋愜雲性。老僧喜芳談。元理滿清聽。松濤何處生。助此清夜興。

西山觀觀石壁所刻揚子雲真像歌

四山冤鳥清晝聞。攀藤覓路松顛分。中有石像鬚眉古。壁窠書題揚子雲。嗟公吾蜀詞壇祖。前無相如竟誰伍。惜未抽身居攝年。至令後人稱黨羽。笑公口吃談非便。我爲公辨當云然。當年石牛符命起。井邊鬼夢呼天子。市上小兒皆王侯。獨君三世官不徙。可憐閉戶真泊如。可憐著述甘窮居。倘使竄名緣獻匱。肯教投閒爲校書。君不見虞帝七首竟無憑。漸臺美人呼不響。銅人夜徙悲長樂。累恩曉望哭延陵。奸雄氣焰空復爾。藏熱收聲正謂此。早知一跌能赤族。悔不來叅太元理。始信蚪螭騰九閭。龍蛇不蟄必湛身。眼前桓子真知己。身後侯芭是解人。今過西山讀書處。令我流連不能去。拜罷靈祠宿鳥吟。似訴長歌明我心。君不見佐命劉甄何其榮。禍至猶看太白星。

## 庚午

### 練時日

練時日。兆精禪。張氈案。升柴爇。彰畫職。幸蜨幃。通胎鑾。晞神休。靈來格。天香滿。紫微開。軒星纂。儼九霄。轟黃旄。曼雲和。鳳笙歌。靈來御。扶金軒。撫天僕。揚六鑾。騶如舞。翔高壇。靈來始。羽節引。總容衛。靈瑤玕。百靈寶。鏘玉珮。肅濟濟。靈來止。駐靈輶。黃龍蟠。雲亭亭。登黜牲。達薌蕭。華鐘鏗。雷坪坪。靈來安。陽位美。顧華堂。色有喜。靈之媵。舞羽幢。紉蘭芷。雲錦裳。歡良夜。進瓊觴。靈來饗。流譽光。眷元祐。福無疆。舉祥飀。倏而翔。

### 帝臨

帝臨圓境。肅穆靜對。元哉樞紐。宅中圖大。四序均調。風和萬籟。機衡不爽。時雍道泰。庶彙咸若。率土來會。陰祇協贊。儼承帝謂。神飈既揚。簸澤無外。含章居貞。皇祚允賴。明德維馨。崇薦斯在。

青陽

青陽在木。棣通族出。氣始和淖。圖熙釋物。羣雍蠢聞。包裹風俗。呼吸浸潭。旁薄斟酌。育微敬始。忘長祈福。羊麥堪飲。衆生欣樂。

朱明

朱明御火。南訛以平。龍星體見。斗樞中繩。進及天禋。雲漢潛萌。羔犢生息。澤流石精。德懷蔭暘。鬱陶心凝。鷄菽以饗。式表虔襟。

西顯

西顯行金。指隅暑促。炎陽下露。滄波澄宿。水香擢脣。羣籟振木。有懷任象。黼斂成熟。雲物觀美。兌景靈肅。麻犬斯陳。以介景福。

元冥

元冥正水。履長在御。司智莅坎。星迴暑度。日至峻狼。北陸凝互。沉潭見心。雪霜老樹。八蜡順成。農穀息務。凝黍是薦。來歲允祚。

遊雲龍山

雨歇數峯清。斜陽下喬木。谿西聞暗泉。夜氣侵叢竹。何人嘯空林。冷然出幽谷。上山賦探微。攜鋤過別墅。薄竊遙岡來。蒼然下平楚。時聞人語聲。不見人行處。支節步清溪。峯嵐出林表。空山一葉聞。驚起雙栖鳥。飄然下層巔。前村樹煙渺。松風谷口來。吹客上峯頂。紺宇出林端。遂達招提境。疎鐘時一聲。微見寺燈耿。谿迴樹色濃。日暝礪光暮。蒼然白雲歸。遮斷前山路。時有採樵人。長歌隔林去。苔華石氣清。雲砌寒蟲響。古道瀑侵衣。雲洞坐幽敞。山深夜不眠。孤月樹杪上。

## 辛未

### 八陣圖歌 彌牟鎮作

有客騎馬來新都。逢人指點說彌牟。森然魄動下馬拜。武侯八陣遺荒墟。緬古軒皇授神術。布軸抗衡森紀律。卦義微叅數更靈。井字成形制尤密。蚩尤殲戮著奇功。千載獨傳諸葛公。五行操算山天授。六花變幻非人工。是日高壘狐兔嘯。四面林樞鵝鵲叫。車廂折衝鳥翔火。飛翼浮沮龍騰跳。橫天鶴列儼成行。匝地魚麗不可釣。憶昨三聘翻然悔。茅廬本爲蒼生起。身比管樂殆過之。心折關張良有以。圖成犄角誰能攻。綸中羽扇何從容。畏蜀當年同畏虎。得狗如今羨得龍。惜哉出師方盡瘁。內蠻跳跋分其勢。車蒙未得驅中原。鋸齒空教吞虜地。事壞誰當挽天迴。心傷不獨指星墜。至今怒氣鬱沙麓。屢遭剗平仍礫卓。戰塲

殘廢爲民田。往往犁邊拾古鏃。月黑時聞金鼓聲。天陰疑有鬼神哭。君不見棋盤市。藝州城。今人不少能兵者。黑白枰中總不清。

將進酒

我不如張校尉。李輕車。博取封侯高建牙。復不如談天衍。彫龍爽。手攔相印爲說客。不文不武究何成。旅進旅退終無益。東家車馬閤門前。西家歌吹聲沸天。壺中有酒且須酌。莫教酒盡求人憐。華亭鶴唳悔何晚。咸陽牽犬事不返。地下應無賣酒墟。世間何事擊空殘。人心如面安可窺。旁人側目君不知。大江流水有窮日。白衣蒼狗無盡時。我常酌君當斟。呼牛呼馬隨君意。清聖濁賢知我心。

結交行

我生豈不願安貧。捉衿見肘羞煞人。我生豈不願求富。金穴銅陵不牢固。我聞士可殺而不可辱。寧以直禍無枉福。君不見伯龍欲爲十一方。有鬼撫掌笑其旁。

君馬黃

君馬黃。我馬不如君馬良。金羈馳紫陌。玉勒點秋霜。朝馳崑崙夜幽燕。籐雲一旦飛上天。天門九重多罡風。忽然吹落塵埃中。孫揚掩面救不得。韓幹欲畫難爲工。回看我馬非龍驤。徐徐緩步遵平康。君馬黃。君馬不如我馬良。

丈夫行

丈夫持此身七尺。安能終日心徇人。何不躍上天衢游。汗漫九垓馳八極。不然萬里邊庭開。請纓仗劍從軍臺。龜茲國邊拍騎去。烏思藏裏斫頭回。胡爲跼蹐藕穴裏。出亦不喜人不喜。平生事業竟何成。卑哉著書漆公子。

美人行

青春華宴張翠帷。吳姬越女裁冰絲。玉顏纖手傾玻瓈。珠翹摘阮爲君娛。爲君娛。君莫辭。君莫辭。妾當舞。君不見美人轉瞬亦黃土。

壬申

田家四時雜興

春至催耕鳴薄言。向田里。戒婦預爲黍。呼兒先載耜。荷鋤帶晨出。晚歸泥蒲趾。田礲藉人力。糞壤須肥美。眷言興農事。努力自茲始。遶屋桑柘稠。掩蔭虛落翠。新麥已登場。餘蠶猶待飼。青秧及時移。田婦攜餉至。杯盤俱瓦缶。初不擇精緻。高樹席草茵。壠上各飽醉。睡倒不自知。安知天與地。種稻已成穗。黃雲倒平原。村村耰板急。人牛一時喧。腰鎌旣穫程。碌碡臥場園。得穀甫入廩。科吏夜打門。丁男輸租回。優游且晚殮。

嚴冬百草枯。鄰里及閑暇。田家重農隙。翁媼相邀迓。列坐酒三巡。或起四五謝。盤薦園中蔬。壺傾家甕醪。酣呼遞相酬。笑語難悲咤。客散送柴門。月色耿涼夜。

成都雜詩

春到城頭花木饒。雨餘始覺鳥聲囂。旅人飯罷渾無事。閑上東門萬里橋。當年遣祭望旌旄。望主賢臣異代遭。金馬坊前空片石。鄉人猶自說王褒。市橋西畔相如宅。滌器當時果有無。今日琴臺生綠草。誰家少婦復當爐。校書投閣事堪哀。想見侯芭問字來。我欲墨池尋舊蹟。縣廳深閉叩難開。賣卜垂簾雜市閭。君平遺跡已摧殘。千秋一片支機石。今作巫家黑虎壇。紛紛割據竟何存。天府休言控劍門。試向籌邊樓上望。暮雲低處李雄墳。烏鴉啄肉紙飛灰。城裏家家祭掃回。日暮烟村人不見。薛濤墓上一花開。

青石橋訪韓三

把袂尋春一騎乘。管絃深院許同登。地當青石東三巷。人住紅樓第二層。曲誤周郎還屢顧。句敲賈島輒豪稱。年來自笑顏唐甚。爛醉狂歌漸不能。

環翠軒

偶從環翠軒中坐。無數琅玕盡遠軒。雲氣欲來庭院暗。雨聲先向竹林喧。天光不照因枝蔽。地仄頻爭爲

葉繁我本書生思靜默。幽禽何事獨多言。

梔子花

此樹家家種。非蘭亦號林。不風香透鼻。有日贈同心。花賤何須賣。苞含便可簪。曉來猶有露。着屣是誰尋。

佛桑

洋外扶桑樹。川中木槿花。開當五六月。艷照兩三家。慣作風前墜。翻因雨後斜。慈雲能護惜。惟見海東霞。

南村曉行

白雲高捲碧天飛。曉起風涼雨亦稀。烟際早聞人叱犢。炊餘時聽婦呼豨。花梢燭燭晨曦照。草色瀼瀼夜露晞。獨有庭前紫荆樹。屢因分析少光輝。

雲龍山

雲龍葱鬱處。冢樹擁烟鬟。江似弓絃直。山隨扁担灣。地因兵燹失。天念祖功還。試看松楸宅。牛眠不足攀。

喜琛芳昆仲至

陋巷原無過客騶。窮居忽得二難遊。風搖竹尾鳥猶宿。日落花心蝶尙留。到處身如巢幕燕。相逢心似浴波鷗。曾聞空谷跫然喜。今日同君頗似不。

贈蔡製亭錦生秀才

門前剝啄騎頻嘶。早有高人挂短蓑。翠竹環軒新雨過。綠槐遮巷夕陽低。羣空伯樂知良馬。舞罷劉琨爲

聽鷄。此日一尊聊復醉。人間憂樂總難齊。

蛺蝶花

蛺蝶來何處。花名偶混淆。紅顏時誤撲。黃鳥或儵捎。肯入莊周夢。難同魏子嘲。最憐風雨猛。猶自占柔梢。

# 童山詩集卷三

癸酉

清明在成都作

清明郭外柳鬢鬢。車馬如雲有墮簪。莫向碧雞坊裏去。遊人多在百花潭。

將之姚江留別范大士顯鞏大建昌

萬里爲官累不輕。舉家陝吉起綿城。心如灘急船初動。眼看山飛浪欲迎。不共蝸居角蠻觸。要從鰲背上蓬瀛。此行頗慰桑弧志。負米兼懷負笈情。

早發涪江

清江滴空翠。曉晚渾不辨。月光水面微。樹色烟中見。舟人貴早起。開柁迅如箭。晨興未盥沐。先戒東棕薦。舟子以棕薦爲臥具。不敢遽開蓬。但聞槳聲濺。川江使船皆用槳。奔浪聽漸近。倏若已後殿。起來問水程。已過幾州縣。一葉凌滄波。千里穿白練。萬山若奔馬。飛騰掣驚電。年輕事未更。江神莫吾玩。

渝州登朝天城樓

五鼓城頭畫角催。四山雲霧黯然開。三江蜀艇隨風下。萬里吳船捲雪來。剩有小舟來賣酒。更無詩客共

銜杯少年壯志無人識。袖手寒天寂寞回。

舟中二首

扁舟一葉輕。濛濛晚烟裏。白鳥溯江飛。時時點秋水。  
有寺懸崖巔。蔚然雲滿樹。忽聞清唳聲。不知寺何處。

晚泊忠州

雨不放山出。雲偏隨堞開。江依巴字走。峯學篆文迴。水冷光難定。山空響易哀。孤舟泊何處。曾記樂天來。

巫山縣

小小巫山縣。雲峯密似麻。天寬才一線。地仄控三巴。瀑掛山山樹。溪流處處花。瞿塘天下險。莫更說褒斜。

謁杜少陵祠

飄泊誰爲浩蕩遊。當年杜老此淹留。一朝詩史爲唐作。萬丈文光向蜀留。風雨茅祠仍見拔。雲烟灤宅尙含愁。艱難我亦棲遲久。試問秋懷得似不。

歸州謁三閭大夫廟

汨羅遺蹟峽江頭。欲賦懷沙淚已流。腸斷女媧空見謠。數窮詹尹復何尤。祇今三戶餘秋草。剩有千山送客舟。愁絕涪陽南浦上。年年杜若老芳洲。

荊州

楚水瀾瀾下。巫雲蕩蕩開。天浮烟樹去。日帶早帆來。鳥下渚宮遠。人喧沙市迴。城邊空幕府。無復舊軍臺。荆門雄七澤。峽口控三巴。灘勢拖狼尾。關形扼虎牙。荒原淪戰骨。古木帶昏鴉。漫話孫劉借。如今總一家。

黃州晚泊

赤壁煙初合。烏林月欲升。鳥投遙岸樹。人語隔江燈。夢去家疑近。愁來枕自憑。天涯遊子意。寒夜總難勝。

夜聞江上吹笛

兩岸風濤靜。中天月影流。梅花何處落。一半在孤舟。

大風渡鄱陽湖

平生浩蕩不羈志。忽有奇愁眼底來。日湧波濤連地動。風驅檣櫓自天迴。山趨湓口千層合。水遶潯陽萬里開。莫道天涯便飄泊。此中還有濟川才。

信州早發

解纜月初墮。滿江烟霧流。眠鷗知讓客。飛去別灘頭。

七里瀨

烟江漁互唱。小艇人相語。峯回不見峯。路轉疑無路。遙見山下人。漸入山中去。

會稽懷古

千巖萬壑越山川。到此欣然欲學仙。我未功成少西子。那能便泛五湖船。

甲戌

鳳山精舍

淨室朝來別樣清。無窮幽趣眼中生。一花開處蝶雙去。萬竹叢中鳥數聲。沙背樹排貽畫譜。山腰田界設棋枰。平生酷有烟霞癖。恐類巢由硬不情。

登寧波城樓

雉堞凌雲脚下開。鯨波帶日鳥邊迴。江中船出海中去。洋外帆從天外來。地近東溟先見日。雲垂南浦忽聞雷。不知何處蓬萊是。遙看滄滄貝闕開。

題俞醉六夫子小照

曠達如夫子。柴門半結蘿。師家鄞縣城南十里。有田三頃。臨江背山村景甚幽。鶴馴隨意放。鷗靜與心和。但有通儒至。全無俗客過。草生青靄滿。松老白雲多。是竹邀同看。逢花必共哦。從遊欣霧下。歸詠敢辭歌。

餘姚蓮池夏日晚坐

納涼何處好。堂後有紅蓮。草裏青蛙國。池中白鷺天。最宜蒲扇坐。恰稱竹床眠。又見奚童報。書燈滿院懸。

謁曹娥廟

哭父訴江涓。投江竟得屍。名齊列女傳。孝重外孫碑。風過猶聞泣。雲行似見隨。英靈今在否。千古愧鬚眉。

蠟梅

東風昨夜有機事。開破封書第一丸。却被蜜蜂漏消息。先差蠟鳳報衙官。枝枝蕊似雕黃玉。陣陣香疑蕪紫檀。道是梅花君不信。如何臘月並衝寒。

二月二日孝廉施樂莘禮畔同遊西湖二首

不因攜酒到湖邊。誰識東風滿畫船。燕剪分開紅杏雨。鶯梭穿破綠楊烟。山如屏障雲中展。天似玻璃水底懸。却笑香山老居士。風流早占大蘇先。

十里湖光一望遙。無邊春色向人撩。僧言攜鶴來三竺。客約聽鶯去六橋。蒲葦有聲漁艇去。芡菱無路酒船招。數聲玉笛人何處。曲院深荷有蕩橈。

同汪孝臣張斐成泛舟西湖四首

新晴慣聽鳥聲交。載得歌吹綠水坳。驚起沙邊雙白鷺。一齊飛上杏花梢。誰家小閣傍山斜。屋角桃花間李花。春色壓簾門巷寂。一鶯啼入隔牆家。

半湖飛霧半遊塵。日色山光總是春。忽聽菰蒲船去疾。放歌知是採蓮人。漁人舟過水風腥。細雨斜收柳色晴。水上樓臺回望遠。斷虹多在別溪明。

汪張二君。餘姚幕友也。孝臣工詩擅長句。有遊天台集。斐成工書。爲先君寫刻治姚紀略二卷。

# 丙子

## 常州道中

鎮日只居水，今朝始見峯。雙鳩烟外樹，孤鶴雨中松。小市人聲雜，高城返照重。惠山何處是，杳杳一聲鐘。

## 丹徒縣

問路丹徒縣，雲帆第幾灣。風來潮似漲，日落岸如山。海燕銜花過，沙鷗傍草閑。江南真可樂，竟什未須還。

## 邳縣

曠野麥苗清，楊花撲路塵。迎人雙雀墜，失伴一驢鳴。地豈峨眉近，山如鳳翅迎。青帘誇酒好，細買一壺傾。

## 武功道中

高原秋雨後，古縣夕陽邊。牛自眠桑下，人多在麥田。一村鴉點點，幾處水涓涓。更向終南望，天梯莫可緣。

## 夜宿寧光州

萬壑千巖裏，蕭條斗大城。三更驚虎入，四面盡猿聲。雨驟林先嘯，風狂澗亦鳴。曉來山水漲，何處問前程。

## 朝天關登舟至廣元午炊晚至昭化縣宿道中得絕句四首

抖擻衣間萬斛塵，今朝見水倍精神。我聞頂有仙人出，疑是桃源欲問津。山神知我愛看山，雨洗諸峯獻好顏。惟有白雲偏不許，只教窈窕露雙鬟。

石巉巖處是龍門。上有雕鐫萬世尊。千佛名經龍定許。莫令燒尾却回奔。  
嘉陵漁父水中居。偶得嘉州丙穴魚。我道不如縱他去。爲儂遠寄越中書。

榜發下第買舟將南諸同人攜酒餞行留詩作別

纔得歸來又買舟。相攜話別各言愁。一時氣味真如醉。千古文章肯類優。  
楓葉初紅是新染。蕉心含綠頗全抽。他年伯樂如垂顧。看我來修五鳳樓。

將復至浙留別唐堯春樂宇

行李依然遂逝波。年年爲客走關河。黯然一別魂銷矣。去也相看喚奈何。  
世上憐才休恨少。平生失學本來多。天公有意君知否。大器先須小折磨。

潼川夜泊

荻蘆花老撲船窓。信口巴歌不改腔。多謝橘亭山下月。伴人今夜宿涪江。

夜泊巫山

自入巫山縣。生涯總是灘。一江吞石怒。萬樹入山寒。茶老忙瓊婦。  
城孤臥縣官。高堂門尙倚。旅夢敢云安。

峽中二首用范石湖韻

峽山江之濱。嵯峨疊亂石。怪狀難殫述。醜態恣驚啞。赤比牛火紅。  
黧類鼠膠漆。攢疑蛤殼聚。脫似龜背坼。其高若垣墉。其牢若瓊壁。  
或似奮鯨鬣。又如曝鱗骼。倒垂掛霜蛻。壁立支雲錫。霞蓋朱絨縈。  
嵐染黃裳襞。

蹲踞虎豹威。杈枒熊羆力。班班鸛鵒限。細細蜿蜒跡。觀茲光怪姿。窮我宜搜癖。大哉造化功。狀此崦嵫色。經紀宵營。嘯吼肆撻擊。厥初誰搏沙。弄嬉空潭側。巧力多勞疚。鍛此千片碧。無乃神禹功。譜此大荒籍。平生多倦遊。奇石未盡覲。竭來巫峽中。刺眼紛如積。我家南村南。舊有三畝宅。縱有竹林趣。未稱泉石國。何當掬玲瓏。歸家細鍊液。顧猶在孤舟。遠作天涯客。

平波行峽底。遇石則斗變。盡日防暗灘。盤渦遞隱見。始覺中流靜。蕩駭忽緣間。少頃便墳起。旋繞復橫貫。初如拖青紫。漸似翻白練。謾謾疑湯沸。齒齒若磨旋。鯨牙吐浮沫。魚尾掉碧暈。山飛岸忽高。地動水相眩。平鋪若熨帖。上冲忽噴噴。轉瞬成頰竄。盪摩作股扑。突然殊叵測。安定乃慚汗。舟子持篙立。勇若操水戰。撓折還衝突。蓬飛怕終轉。振柁幾併入。招竿幸未斷。中窪更拿楫。半陷尤加牽。喧呼捷過雨。顧盼快驚電。愀愁傾跌屢。防維設法徧。我來立船頭。常有浪沃面。不少扣舷歌。翻笑客舟亂。陽侯量自容。豈便憎吾慢。設機恐人心。無乃太相玩。吾璧不可投。按劍力猶健。

昔年過琵琶亭。離內有主人相迎款洽。備至今再過之。邈若矣。爲之撫然。

昔年江畔維舟話。今日亭邊獨再經。只有垂楊無勢利。向人猶自眼垂青。

神鴉行

富池廟祀西陵守。廟前神鴉傳已久。往來索食不避人。拋接高低皆到口。我怪其異欲彈射。其奈黨羽紛前後。人言此是甘公魂。精靈不可機械取。我思將軍英烈氣。關公尙避曹瞞走。安能幻作羽毛身。嘖嘖向

人求肉酒。嗟爾神鴉。應知足藉。賴靈威惠。實厚君不見。權門索賂。多走狗。憑仗威福。無不有。

### 甘將軍廟

名將爲神信有靈。當年戰地血猶腥。營前鼓吹聲方厲。陣上傳杯酒未醒。日漾銀濤疑被繡。風搖鐵馬似聞鈴。代函古誼今寥落。空望遺威奠醊醢。

### 魯肅墓在鎮江府城東

奮武遺墟臥石麟。江東霸業已沉湮。晚年空笑求三郡。早歲曾經指一因。山色凝愁連北固。水聲流恨入西鄰。借荆能落曹公筆。切勿輕看冢內人。吳志本傳。後備詣京見權。求都督荊州。惟肅勸權。借之以拒曹公。公聞權以土地樂備。方作書。落筆於地。

### 金陵懷古

大江劃斷兩邊天。幾度臨江意黯然。折屐至今思謝傅。投鞭終古笑符堅。雪消水榭聞吹笛。日落新林有渡船。試問從前賦詞客。誰能寫盡六朝煙。

### 登燕子磯

紺字凌霞不數重。迴欄已上最高峯。江邊一雁來殘浦。城上千鴉亂夕春。靄靄黃拖淮岸柳。濛濛綠滿孝陵松。劫灰自昔關天數。請聽寒林午夜鐘。

### 金山

自是人間第一山。孤峯湧出亂流間。瓊樓倒映波中影。玉塔高盤水底巒。吳楚萬家歸掌上。江淮兩岸落眉彎。停舟漸俟風濤息。佇看帆檣歷歷還。

楓橋夜泊

初月上平林。微風動高樹。驚起沙上禽。飛過楓橋去。

錢塘懷古

宋家事業已全銷。漫把餘杭說故朝。江上只應寒月照。湖邊偏見暮雲饒。王師不抵黃龍府。帝子空餘白馬潮。日落諸陵何處是。冬青樹老雨瀟瀟。

弄珠樓

畫欄無際俯沙洲。樹色沿郊一望收。幾處鐘聲浮綠浦。誰家笛吹咽紅樓。蛤非如蚶時時有。蛙亦名雞頓頓羞。向晚湖風促歸去。滿船明月漫相留。

題馮孝子太行扶輓圖 奉大人命

太行九折古羊腸。孝子從來此勒韁。長恐登危兼服闋。何堪扶輓更他鄉。天寒潤鬼啼山底。日落林鳥泣道旁。罔極深恩何處報。此圖休遣挂吾堂。

硤石舟中

綠野秧初遍。青堤荻正生。方疑一水狹。忽見兩峯橫。日落樹無影。風來浪有聲。海昌何處是。早見一拳城。

海昌望海

雲與地相接。水將天欲吞。雙輪浸日月。一色混乾坤。島嶼竟無影。波濤略有痕。平生夸海口。到此笑吾言。

嘉興逢汪大孝臣以遊天台詩賦見示時余將歸劍南作長歌志別

憶昨同君太湖醉。狂歌大叫姑蘇市。鶴澗搖船鄧尉山。虎邱走馬靈巖寺。春光淡沱酒盞濃。鞭絲帽影隨匆匆。浮雲聚散不復問。逐流縹緲分西東。我歸西蜀還飄泊。君向東甌更蕭索。天台勝景誰能探。劉阮桃花同此樂。茲山聳翠東南雄。赤城瀑布垂長虹。當年登高作詞賦。中興只數孫興公。君家詩學冠江滸。氣壓滄溟前無伍。括蒼洞口高題名。桐栢山頭訪前古。構李城邊日欲斜。巷北逢君坐酒家。興酣示我紀遊什。句句仍帶山中霞。咫尺仙山不得上。覩此令我生惆悵。幾時重訪海門山。醴泉瑤草知無恙。明朝一草返家鄉。分手無端淚幾行。極目江湖春水白。側身天地暮雲黃。

除夕

歲華已去不能招。又見春光在樹條。淡白梅花先索笑。嫩黃楊柳漸伸腰。人情念舊還如昨。世事翻新祇隔朝。把酒圍爐度今夕。好將風雪壓寒宵。



# 童山詩集卷四

丁丑

觀繩妓歌在錢香樹先生座上作

平場如削城西隅。長繩挂竿尋丈餘。美人捲袖向空擲。觀者如堵爭喧呼。一髮千鈞等兒戲。弓鞋來往如平地。乍驚波上洛神遊。却訝樓頭綠珠墜。游絲裊裊動長索。應是五銖仙體著。翻身忽躍入雲霄。但開環珮風中落。別有循環姊妹行。掣電流星曜睽光。閃然欲下不肯下。纖腰倒挂學垂楊。舞罷人看傾國姿。粉汗釵斜態亦奇。數聲雨點催花鼓。六街風細裙帶垂。樹影西斜日卓午。坐見此伎世無伍。乃知人間蹈險人。挹其容顏正媚嫵。

登弄珠樓

小樓四面挹風清。真箇船從鏡裏行。漁港雨過新水漲。鷗汀月落暮潮生。淡黃山色螺千點。深綠園林鳥一鳴。便欲浮家此中住。只愁尙自絆浮名。

題錢舜舉符堅訪鳩摩羅什圖爲查梧岡先生作

龍驤將軍何僕僕。朱衣赤冠來曲沃。天生背帶篆文來。屢向鞞疊問圓覺。明星昨曜集靈臺。主有賢臣外

國來道安雖至何曾聽。呂將尋師竟不廻。豈知白日浮雲變。甲申不見光明殿。佛法如天救不得。尾長翼短空復嘆。當時誰歌阿得脂。魚羊食人無復遺。新平寺前成一夢。至今徒見畫鬚眉。錢郎作畫工染翰。先生什襲邀同看。常年意氣欲臨江。畢竟何嘗登彼岸。我來拂絹寫新詩。對畫還抒送難詞。請詢靜理旃檀日。可悔馳驅中國時。

謁張中丞許侍御雙忠祠在海寧縣

從來圍城攻既久。析骸易子古亦有。不聞食及三萬人。人肉食盡仍死守。死守者誰許與張。戮力同心保睢陽。已將愛妾饗軍士。更無雀鼠充饑腸。氣吞胡虜聲碎齒。望斷官軍血裂眚。可憐南八真男兒。恨煞進明仇未洗。吁嗟南八不須悲。坐視不救誠有之。當年執政多左袒。莫恨進明恨房瑄。

觀錢塘潮歌

八月十五錢塘潮。吳儂拍手呼相招。士女雜坐列城下。人聲反比潮聲高。江頭日上潮未起。漁子拿舟泊沙嘴。笳鼓乍鳴人競看。一齊東向滄溟指。忽聞江上聲如雷。迢迢一線海門開。萬馬奔騰自天下。羣龍蹄跳隨波來。潮頭十丈飛霜霰。水氣橫空撲人面。天爲破碎城爲搖。百萬貔貅初罷戰。迨還不聞市聲死。羣兒夸強弄潮水。小舸顛簸似浮萍。一時出沒烟波裏。我是人海中的一粟。覩此目眩身爲縮。明朝風靜渡錢塘。猶恐再遇靈胥靈。相傳潮神爲伍子胥。

新春苦雪次陸漁六宙冲韻贈天寧寺僧

旅舍春寒苦不禁。門前活水又成冰。梅邊載酒方思客。竹裏烹茶恰遇僧。萬里思歸歸未得。一年春好好何曾。連朝擬著遊山屐。塞道泥濘應且憎。

將歸劍南之鄧別俞醉六師經

杖履春風坐有年。擔囊行色又蒼然。後堂此日辭張禹。前帳當時授鄭元。蜀道如天雲渺渺。吳船連月雨綿綿。聞雞起舞尋常事。肯讓加鞭祖逖先。

過菱湖訪費雲軒先生元龍山莊先生官綿時余受知屢試第一

苕霅最深處。菱湖又一村。平田春水岸。小艇夕陽門。舊忝後堂客。新嘗若下尊。十年深仰止。今始入龍門。

嘉禾留別漁六

君知我欲歸。送我江南路。感君纏綿意。爲君且遲顧。于役既有年。歸思今始慰。不辭道阻長。眷此他山助。關河一以隔。後會知何處。淼淼水波雲。離離長堤樹。相看兩無言。分手自茲去。

別烟雨樓

鴛鴦湖上一飛樓。得荷同人十日留。此後聊同魚艇散。何時再與酒船浮。喚人有意惟黃鳥。對我無心是白鷗。囑咐磯邊釣莫釣。會乘烟雨占渠頭。樓下有釣繫磯。

京口阻風

心擬雨無阻。身偏風見稽。夢中如有翼。飛過大江西。

遊金山寺

自我身爲吳越客。揚子呼渡三揚帆。六年未著登山屐。行程牽迫如羈銜。金山咫尺不得上。寸心自愧知愚凡。搗來鐵甕城邊住。浪打堅城如鼓儻。詰朝塔鈴似招我。好語邀上金碧巖。興來性命誰復顧。相攜主僕三人咸。須臾輕舸抵山脚。老僧邀我言喃喃。引路沙彌捷于兔。轉灣抹角真秋巖。我本遊山非事佛。不用擊磬開經函。飛磴凌墟上高頂。縈迴紺宇藏岑巒。尖峯萬仞雲可握。禪房一徑花光絨。是時炎天正初伏。火雲硤兀威光嚴。塔尚不上恐喘汗。但看石洞爭嵌嵌。妙高臺路何斗紉。堞堞萬古窮雕鐫。古來勝景此爲最。不復畏暑窮其巔。靈境覽盡須歸去。緩步肩披輕葛衫。前此老僧更相送。賸泉亦受真貪饒。同行各鬪登山健。笑謂誰如鬢鑠漸。中流復見江豚拜。浪花滾起海鳥鷗。回看壁立飛霞散。邈乎巧錯天工鐫。

遊平山堂

一路山低水亦低。畫橋多與畫樓齊。誰家攜妓歌聲沸。獨自尋鶯柳影迷。隋苑何須追往事。蘇祠難與續吟題。老僧問我來何地。在蜀岡西更在西。

謁穎考叔祠

彼狡今何在。孤祠穎水濱。已悲嘗食母。偏隕拔旗身。虛閣松聲怒。頽牆竹色新。春秋開卷看。第一好純臣。早行汝州道中二首

雲籠遠樹暗。日照亂峯開。鴉鵲驚飛去。牛羊遍野來。

漸覺蒸胸熱。全無撲面風。馬行山色裏。人在綠陰中。

### 華嶽

峇峇西岳竦。一一衆峯奇。洗頭遙見女。拱立果如兒。烟鎖陳搏室。雲開武帝祠。峯巔如果到。何必涕漣漣。

### 褒城縣

秦棧西將盡。褒斜北向橫。三川餘故國。一笑果傾城。昔獻龍鰲種。今遺癭婦脰。雞頭何嶂屺。莫作牝雞鳴。

### 費禕墓

奉使伊誰不辱君。惟君無負股肱臣。鹿車載駕眞名士。虎帳彈棋信可人。一自北邙同寂寞。至今西土遂沉淪。常時望氣何人識。千載同聲只郭循。

### 試畢仍歸鵲鴿寺

歸山重掃讀書床。一路寒山木葉黃。遊浙有師皆老宿。歸川無試不高庠。掃窓已見蛛懸網。翻盎先看鼠自忙。一秀才回詩已貴。吟箋才寫被人藏。向補歲考例附三等。此回科歲俱附高等。史學臺洗馬諱貽謨。同知從錢香樹受業。謂諸生曰。吾考蜀三年。今始見一秀才。詩字文可稱三絕也。即日送錦江書院肄業。

### 翰

鵲鴿寺夜多不寐。有懷餘姚張淳初。年茂才邵二雲。晉涵平湖沈雲椒。初秀水錢受之。受穀兩中

叢林眞是一枯叢。不盡寒山爰爰風。無故忽鳴驚月鵲。有時高叫度雲鴻。南邦故友空相憶。西蜀人才孰

與同。正在夢中雞喚醒。起來無處寄詩筒。

總督黃廷桂纂通志誤引蜀都賦土產而牽連疇區二字未刪故以詩笑之

剝皮纂通志教人捲地皮如何疇區受與塊欲鞭之

禹碑歌效楊升菴體

我聞神禹隨山紀刊桮。立碑岫嶺端不袤。天假神權收玉冊。太靈寶洞雄南呀。龍文蠕蠕勢萬丈。祝融凌  
炎噴生煨。退之開荒始搜得。石廩騰擲悲聲訥。嶢嶢半空稀草木。紫殿高聳迎晨暾。星黏天柱近可摘。靈  
風落帽披鬢影。窮追夏后登履跡。茸茸豪塞封谿畧。鸞飄風泊不知處。空想倒薤交萌芽。後來踵武推允  
叔。金石考古探幽遐。觀縷銘彝並敦鼎。細及釜鬲親捫撾。獨於靈臺笑荒怪。危崖踏蘚空喘牙。晦翁繼亦  
登南岳。委曲仄逕尋紆蛇。更偕張子蠟山屐。石贅積鐵橫枒杈。悵望神踪不可到。得非閭壑杉蘿遮。吾蜀  
升菴最好事。天根海窟收奇葩。親云傳自嶽麓院。季文攜得從長沙。嗟余生晚見益隘。斷續苦好如啖茄。  
螺書喆屈形最屬。螭殼篆繡堆硯啞。鋒銛森森起鱗脊。枯藤裊裊纏林樞。蝶芒豎立外稜露。蟲蝕剝落中  
剝窪。憶昔洪荒極滄莽。巢居黎庶如棲鴉。羽淵愁見黃能化。過門不恤兒啼家。虞余繡衣備使令。楫櫓櫟  
軌襄重華。鴻濛幽窘犁婁殍。支祁伏鎖潛深潭。遍歷元趾功底定。盡力溝洫懲驕奢。蒼水披函將帝旨。元  
圭錫命欽拜嘉。盤石屹立垂萬古。平城括命非誕誇。蟠光黑字雲如漆。青泥古印倖杓窳。驟颺風雷走呵  
護。猗猗巨掌相抓拏。何物道人窺此石。剝落古碣涎流蝸。君不見宣王獵碣置孔廟。商代銅盤歸官衙。從

來神物有時出。何事聚訟紛如麻。矧此深藏靈峙室。創獲尤當珍惜加。奇文欲辨已箝口。技癢安得麻姑爬。第恐精英忌洩露。朝夕變化隨烟霞。要當斷骨煩巧匠。卯汁拓本瑩無瑕。寶以紺綠鼻玕珥。金題玉隲籠幅紗。興來秃筆應滿瓮。看掃盈案龜文斜。

### 青羊宮觀銅鼎歌

我性癖古過米芾。洗眼不見寶晉齋。青羊銅鼎饒古刻。銷沉尙未寒灰埋。老僧邀我方丈坐。捧出未示先磨揩。寶光逼我不敢近。起視照日持當堦。方如簾簾底如鬲。緣尻凹凸形葳蕤。初疑浮河曝日龜。又似迴立當風驅團團。菌蠢脹腹豕。縮縮負殼垂涎螭。模糊細篆半磨滅。歲月討論煩吾儕。老僧對我增感喟。爲談瑣事供噉唾。云昔法祖渡南海。艤舟纍鸞留江淮。沙邊夜氣貫牛斗。漁網拾得浮攬簪。河伯出獻老蛟怒。江潮颶作風濛濛。一自攜歸伴孟鉢。萬古留鎮相傳皆。此地兵燹幾過眼。戰馬蹂躪時填街。往年流賊肆屠戮。計簿草殺攢鞬。蜀宮圖書付灰燼。血染城郭擄其娃。錦官城頭夜烏叫。青羊筆硯堆枯骸。浮屠村舍俱瓦礫。兵民百萬爲狼豺。此時寶鼎誰持護。得非鬼力神所差。至今禮佛空王殿。古韻往往鐘磬諧。此語荒唐出處怪。我聞頓觸憶古懷。在昔黃帝迎胡髯。蚩尤作象形徘徊。後來荆山九牧貢。鍊出五色爭神媧。湯鼎爛石旱可祝。玉璫出渭波搖颿。汾陰射廬漢武祭。百夫扛擯相搪挨。是鼎于中豈其一。辟邪定可驅厲疫。不爾何爲百遭毀。雲覆翻見龍甲排。廬江獻後鄭衆死。悔不讀書如高柴。市兒何知寶康瓠。只解屬壓調珍鮓。有緣却伴清淨室。松月夜照門常闔。爲君走筆賦始末。冥搜險語文多俳。向守環堵安睹

此真成井底公孫蛙。翻然却下林巒去。猶見葱葱山氣佳。此鼎不載金石錄。著述安得無離匏。何當遍覓名山跡。扁舟一棹天之涯。

再過楊升菴墓有感

有人不知相國名。無人不識狀元塋。狀元謫死永昌戌。相國碑高新都城。當時議禮誰爲主。聰尊逢君爲首輔。掖門一慟震闕廷。至今御河自虹吐。大禮未定身先危。杖之不死神鬼持。插花盤髻粉傅面。醉來裙衫當臨池。可憐一字千金直。急付裝潢尙難得。百峒獐獐皆知名。九重虎豹竟不識。丹鉛錄比離騷詞。有明博學無與媲。蜀人固自例遺謫。潮陽僞耳無此悲。至今行客墓前揖。水聲猶似向人泣。試哦海畔孤臣詩。不覺淚下如綆廢。

古劍行

夜來雷雨吼飛泉。鋒芒上與星斗躔。竭朝放出琉璃匣。青霜一道翀雲烟。我聞昆吾玉能斷。又聞武庫遭火變。平生膽氣不解柔。天生剛骨神鬼愁。何須太阿夸往古。石函遠出豐城土。但令有人加拂拭。猶擬呼龍夜行雨。

灌園

不過數弓地。能教百產生。花儲嬰粟種。樹帶石瓜名。蜂以鼻爲目。蟬將翼作聲。閑來無所事。抱甕圃中行。飲何文淵前。盡達者堂。

十年不登達者堂。今日重瞻玳瑁梁。老人開門欣相見。坐我廣廈斬簾牀。鞠躬先執弟子禮。後序寒暑增慨慷。問答未已羅酒漿。鼎列炙膊盤糟觴。我抱脾病久節飲。夙凜婦戒怡然忘。譬如猩猩最善醉。始則相戒終相嘗。眼花大地旋如磨。遽然一枕無何鄉。覺來胡蝶紛不見。但見落日懸扶桑。人生富貴何時足。碌碌終常歸北邙。對酒不飲酒應笑。豈有再來年少場。君看庭前桂花樹。昔如我短今已長。但使相過使相飲。一任物外雙輪忙。

贈王用予安字明經

王君鬢若緣坡竹。爛爛巖電出其目。清晨剝啄來叩門。使我高齋眠不熟。雲雨相離又十年。五經腹笥仍便便。君歸滿貯桑落酒。待我來嘲邊孝先。

巴東晚泊

欲下吳江棹。聊停蜀客船。夜長聞擊柝。寒逼想衣綿。樹落山山雨。林飛處處泉。寇公遺廟在。松柏尙蒼然。

歸州

天寬峽又束。地逼郭逾偏。屈宋行吟處。孫劉戰伐年。灘聲喧墜葉。亂石枕飛泉。幾度渝歌曲。誰家上瀨船。

漢陽感懷

寥落風塵又一秋。無聊仍到酒家樓。救貧豈更無長策。多病何當更遠遊。巴峽啼猿猶入夢。武昌哀雁不勝愁。曉來無限離鄉恨。付與長江天際流。

黃州

江邊木葉紛紛落。天外飛鴻陣陣鳴。赤壁已無橫槊氣。黃州尚有洞簫聲。

小孤山

何年海風刮瀛洲。蓬萊吹落西江頭。青天波湧鼉鼉吼。黑夜浪撼蛟龍愁。丹崖陡立三千丈。斬絕蒼緣莫可上。危亭聳閣誰扶持。蚪木蔓花空依傍。昔人以孤言其形。今人以姑實其名。洛神湘妃皆被謗。石湖誠齋同此情。我來正值朔風阻。禱神却不禱神女。山靈點頭旗脚回。占風舟子夜深語。

牛渚晚泊

此夜西江月。遙懸北岸雲。空憐李太白。不見謝將軍。樵雨綠山出。漁歌隔浦聞。然犀如可照。幽族應當分。

天門山

大禹神功費剖鑿。巨靈劈破勢猶運。雙崖拔地兩邊斷。一水穿天萬派懸。日影曉嵐雲外合。風翻寒影浪中圓。何常乘興披烟霧。直跨峯巒學地仙。

登蕪湖城

極目江天客思長。城頭風景最堪望。一江白浪鳴秋雨。兩岸青山話夕陽。出網鮮鱗饒美味。啣蘆過雁落聲長。天涯估客誰云樂。日坐樓船數去樁。

無錫縣

初來無錫縣，一艇樹梢橫。雪擁春申澗，雲藏泰伯城。惟多沽酒興，誰和咏詩聲。只有鄰船笛，聲聲動客情。

天寧寺 在嘉興城內

鐘磬出松林，沉沉竹院深。半天洒風雨，十日盡霖霖。幾見蛇盤帶，空聞鼠弄琴。支公飛錫在，乘興一相尋。



# 童山詩集卷五

戊寅

## 南宋宮詞百首

宮詞者所以紀宮中行樂之詞也。而宋自南渡以來。長脚專權。大眼喪氣。頒下金牌一十二面。偏安王室百五十年。其間聞鶴淚而驚心。尙何紫禁巡遊之樂。撫攢宮而流涕。豈有翠華臨幸之歡。然而天地無情。白頭空老。河山如故。觸目生愁。余在杭所寓第一山。卽當年歷聖之三殿。凡鸞輿之所幸。多宮掖之軼聞。逝者雖湮。後來可鑒。因作宮詞百首。以補正史三長。不無譏刺微詞。半借風謠規戒云爾。

表裏湖山畫不如。六飛臨幸建炎初。蟠空帝闕紅光繞。華蓋雲頭下屬車。  
元朔朝正各國來。景陽鐘罷曉光催。百僚鵠立聽宣制。萬歲聲傳繞殿雷。  
禮祀青郊瑞腦香。樂章初奏珮聲長。雲開五輅從天下。點點繁星簇玉皇。  
樓捲朱簾雉尾開。鶴銜恩詔下瑤臺。閣門纔見鷄竿立。各路腰鈴報赦來。  
鳳山行闕鬱青葱。聒耳鴉聲入禁中。自遣諸兒彈射後。一齊飛去赤崖東。

雲邊香鼻紫烟輕。日午還宮內侍迎。不用玉階瞻豹尾。闔門先聽鮑魚聲。  
曉奉慈皇入翠寒。凌虛上壽酒杯寬。東風解得君王意。開向醪醕不肯殘。  
偉觀堂上壺天景。德壽宮中賞月時。無數女童池上去。白蓮橋畔笛橋吹。  
臨池太母坐龍舟。柔櫓輕搖狎水鷗。更道此中宜臥看。芙蓉十里玉塘秋。  
步捧肩輿盡母歡。尋花深殿遶朱欄。昨宵曲宴需雲內。親向官家進小冠。  
每從侍寢檢龍衣。半背輕綃淚未晞。暗袖金銀示同伴。爭看蝴蝶鬪高飛。  
鸚鵡來從玉塞旁。金牌小字認先皇。不知良嶽人非舊。猶向籠邊叫卜娘。  
幙頭院子繡紅巾。餛飩明朝捲箔陳。何物伶官談丙甲。齊傳聖主赦饕人。  
節近元宵宴壽皇。鼓吹燈火鬧錢塘。外間想是年豐稔。細把民情問秀王。  
艮山門外好遊春。玉輦扶來不動塵。試捲軟簾偷眼望。一灣新綠上湖濱。  
生菜頻挑日曉烟。中宮淪茗賞花天。半園柳絮教人拾。特爲春寒作柳鞭。  
柳絲高處露紅旗。幾朵鞦韆畫院垂。時有小姬來鬪草。花間笑語伴歸遲。  
遠信開緘淚已揮。使臣方自北邊歸。寄來手帕痕猶濕。不忍重開御襯衣。  
百子池頭御柳黃。萬年枝上月初長。半窗忽有金鈴響。放鶴遙知是小璫。  
九重清宴拓朱櫺。淨几無塵屏畫屏。邊報不來春晝永。自調香墨寫蘭亭。

清秋無事獨徘徊。內院無人共把杯。風月一聯當折簡。橙香酒熟待王來。  
慈寧慶賞牡丹期。正是椒房受冊時。舞楊花曲誰歌得。御製新聲作賀儀。  
香山尊宿上蓮臺。共坐肩輿梵夾來。向晚金鈴山外振。新從天竺降香回。  
金簡臨池世鮮雙。簪花書法女中師。官家閒向劉妃問。何事香名外國知。  
御床風細靜焚爐。鎮日彤庭一事無。忽有棋聲花院裏。對彈知是沈姑姑。  
產閣時儲海馬皮。誕辰先遣御醫知。明朝宗戚皆爭賀。錢果爭先送洗兒。  
射垛標竿出水涯。翠芳蘭曳岸邊斜。年年湖上春三月。常見官家出看花。  
魚船繆見雜花飛。集慶池頭鳳不歸。昨日玉顏偷拭淚。無人知是哭閤妃。  
歷學宮車錦作圍。至尊遙自景靈歸。不知多少簪花者。但見紅雲夾輦飛。  
鳳鳥欣瞻剪霧開。未知翠羽幾時回。將軍昨揖單于去。親向瑤池奉母來。  
玉壺午漏響琤琮。駘蕩薰風日上春。冰果浸來香案淨。桐陰小殿讀中庸。  
羅刹江頭浪走沙。北風橫打御舟斜。遙傳塞外攢宮至。中使先簪白柰花。  
三殿優游話太平。經筵御罷頌文明。侍臣莫進烏鬚藥。白髮蒼顏示老成。  
玉腕池頭滌硯池。花牋侍御寫烏絲。微聞閣筆徐生嘆。恨不生同黃米時。  
秋至深宮玉漏添。賣楸聲裡解金錢。剪來露葉盈頭插。無限新涼入髻邊。

八月江潮海上生。臨江御座與潮平。水軍百萬拋沙板。望闕如雷奏曙聲。  
落葉盈堦夜雨零。寒侵翠繡蹙圍屏。紅鑪獸炭今年少。詔取嚴州鶉鴿青。  
蠻獅坐設日曛曛。香噴金龍遶殿中。別有黃羅擎盒去。齊傳玉食賜東宮。  
新頒式樣出宮門。不許銀牌冒玉津。親姊往來原不禁。爲曾進過御前人。  
老鷓緣何踢弄希。未知何事出宮闈。昨朝德壽傳恩詔。速向閩州喚取歸。  
月夜西窗細按箏。指尖撥出柳梢青。小詞更遣張家製。新樣絲桐奉御聽。  
穠華幾樹御園新。剪落金盤朶朶勻。捧出外朝人競問。誰能分得紹興春。  
帝姬嬌小繞廊行。正直傳臚殿上聲。漢國欲招新駙馬。隔屏偷看唱頭名。  
曉寒睡起黛慵描。緩步牆陰碧草交。一架薔薇扶不起。被風引上綠楊梢。  
寶墨叢奎四軸餘。驪珠顆顆佩輕裾。內官手裏金絲扇。猶是先皇玉潤書。  
冰盤釘餠浴蘭時。酒汎菖蒲色色宜。未要門楣懸艾虎。別拈通草刻天師。  
金殿傳柑綴雪花。綵樓火樹望中斜。宮中遙指鰲燈處。似近司前蔣使家。  
攜文殿上御經筵。支酒擔冰舊例沿。教問翰林誰宿直。今朝新旨賜餐錢。  
深宮密坐話昇平。小說閒消永晝清。演史欲聽新曲子。簾前催喚穆書生。  
彤庭拜禱萬邦臨。朝罷還尋墮馬簪。聞道金人獻方物。就中奇絕玉觀音。

獵獵秋原試放鷹。擎來內史鷗稜稜。南來不見巢生犬。吠漱唯推北司龍。  
靜室逍遙著小巾。案前競列果肴新。皇家最信箕仙事。深夜焚香問小陳。  
那有餘閑製小詞。揮毫偏不費神思。宮娥偷得夜來句。盡是唐人集句詩。  
殿開打麥傍城南。臺上觀耕澤遍覃。繭館尙書傳內旨。明朝皇后要親蠶。  
承恩曲院倚紅粧。向曉蘇堤看海棠。楊柳也如新得寵。向人爭舞綠羅裳。  
西溪芳草藉輿轡。拂帽春光香滿街。每過山林除酒稅。肆中便覓御書牌。  
誰家紫闕燦星圓。軟坐籃輿色倍鮮。從此宮衣嫌翠領。各人爭戴孟家蟬。  
日長無事奈愁何。睡起含情呵欠多。偶見雙鬟相並立。綠紗窗下教鸚哥。  
月色橫空按綠腰。秋堦梧葉總飄蕭。舊京式樣都零落。却唱清歌大海潮。  
清修尼寺偶焚香。原是中宮勅建坊。結伴藕花洲畔過。采蓮驚散小鴛鴦。  
雙雙視朝天未明。退回香案內班迎。宮娥不識監司職。閑向屏風數姓名。  
覽鏡雄心未肯低。每來角射教場西。未知墜馬傷何處。接骨時聞召小祿。  
御退宮衣五色兼。那堪重覩粉紅衫。是誰拾得香羅帕。猶有金龍小印鈐。  
萬歲山前飛畫鷁。百花湖裡弄輕漪。曉來春色龍池動。太后乘舟看水嬉。  
湖上看花顰幸頻。天街如洗輦車塵。十三門外雷聲動。大內趨迎女聖人。

花落徘徊滿院香。盡收殘蕊作糕糧。小姬別製梅花粥。試請君王小盞嘗。  
草制常教近御床。內批捧出詔書黃。日長鎖院無宣喚。獨步花陰玉砌旁。  
鸞綰閒引玉津遊。恰值青氈祭祀秋。說道宓妃今犯戒。更求神像鑄盤溝。  
楊家妹子最承恩。書學官家秀絕倫。忽見題成琴鶴句。始知密幄有詩人。  
電窗窈窕燭花明。蓮漏傳籤報四更。金殿有書忘目痛。親拈玉管錫佳名。  
挑盡宮燈不肯明。月斜深院夢無成。翻憐靈鵲知人意。未曉先聞喚起聲。  
芳陰人醉漏聲遲。花似醺容透玉肌。珠箔半鉤風乍暖。雕梁語燕聽多時。  
貴主門楣孰敢經。內家餽問不曾停。猶嫌金屋離宮遠。別築樓臺近掖庭。  
舞鞞輕換步珊珊。齊著金羅照畫欄。忽報蕊官宜已到。大家爭向繡簾看。  
純饌供錢樂事寬。朝朝撲戲奉君歡。却憐內侍勤勞久。詔許新辭煖盃官。  
雙雙宮女駕湖舟。覆額青絲未解羞。忽避人來橋裏去。藕花深處一回頭。  
輕容側貢會稽紗。組繡年年進內家。染得越綾天水碧。新裁霞帔向人夸。  
清霽亭前賞木樨。輕敲牙板按歌遲。官家只喜聲聲慢。休唱尋尋覓覓詞。  
黃閣宜麻日向晨。爲論時事却妃嬪。急傳內侍因何事。要代綸音答使人。  
逐隊瑤津弄槳初。香生菱角襲人裾。花間笑博方纔罷。賭得寒光冰玉膏。

春來紅紫闌芬芳。錦繡亭邊備解忙。姊妹邀排挑菜宴。笑看內侍喫生薑。  
水亭四面碧蓮開。避暑隨時翠輦來。怪道無人侍執扇。羣藏深樹摘青梅。  
建溪歲貢紫雲團。分得龍文御餅圓。妃子深宮剛睡起。頻呼小婢汲泉煎。  
雪香亭畔拭啼痕。手握青芝記舊恩。銀鑰不收花自落。閒看苔綠上宮門。  
朝來宮女病懨懨。怕見飛光入畫簾。記得神仙留寶扇。試教挂去鎖香奩。  
天廡分棚滾畫毬。龜茲樂奏殿東頭。繡衣舞動哥舒棒。爭唱紅旗第一籌。  
龍樓侍寢受恩新。花外流鶯款語頻。宮女姓名排四季。按時傳喚直班人。  
臚陳百戲御筵張。燦錦亭前月送觴。忽召太醫來內殿。官家昨夜飲糖霜。  
碧琳堂上敞窗櫺。龍笛仙音徹內廷。偶有松風滿清禁。却嫌絲竹不堪聽。  
天基佳節滿朝歡。上壽仙漿第四盤。杖鼓堯鄉纔舞罷。琵琶更教一齊彈。  
德基圖記失堂東。點勘曾經索內宮。昨有小官腰下佩。別教收鎖寶函中。  
教坊賺色內宮傳。萼綠華堂按管絃。聞有木笄新補放。宣來教唱杏花天。  
水殿東頭起露臺。金蓮隊隊踏蒼苔。小姬藏入垂陽裏。忽地拈花笑出來。  
鴛鴦打散合蟬圓。月夜笙歌兩殿閒。譜出霓裳誰解按。舞來別賜縷金裙。  
奉詔歸寧鹵薄齊。祥曦筵上繡釘梨。同時眷屬皆恩賚。執箇先分翡翠簪。

德壽宮姬宜紫詔。紅霞帔號遊傳呼。就中別有承恩者。不敢分明問玉奴。  
花枝馬上繡鞍明。錦鎧非同舞袖輕。知是君王方右武。故教女子亦能兵。  
曉風吹送輦聲遙。隔夜宮粧候早朝。新髻盤成不走落。故來隊裏逞嬌嬈。  
芙蓉並蒂映秋江。小妹低闌立一雙。纔整歌喉學鶯語。被人傳喚不成腔。  
一掬河山如錦繡。三千玉貌似花叢。一朝放出君門去。不忍回頭憶故宮。

夏日西湖二首

水光明鏡出。山色翠屏開。地濕長疑雨。天晴乍殷雷。漁歸深浦去。僧帶夕陽回。  
不盡烟霞意。偏逢獨自來。  
西湖佳麗地。大半醉紅裙。此輩真蠅蟻。相歡聚蚬蛟。寺多今代創。碑少古時文。  
惟有孤山頂。梅花總不羣。

石門道中

崇德片帆過。停舟問土風。人家桑柘外。村市竹林中。雪落遙知鷺。霞橫近似虹。  
東吳栖泊久。漸已作吳儂。

食桃

頗愛味酥如酪。却憐色嫩着脂融。高秋記得貧人食。舊在堂前五樹中。

# 童山詩集卷六

己卯

偕周尤廷士拔遊龍神堂二首

尤廷德陽縣令周明府際虞次君也。明府豐潤辛酉孝廉。與先君同年。去歲曾邀余至署。爲太夫人書七十壽屏。故遣子來謝。尤廷尙未弱冠。少余一歲。詩文敏捷。非凡器也。留連數日。遍遊南村龍神堂諸寺。得詩二首奉贈。

禪林何處足堪投。除却龍神少可遊。花被客蟠根盡出。竹儲人看笋長留。不妨對佛同流釀。且喜因僧得酒簫。可惜栢松官取盡。荒山未便挽賢騶。君家豐潤我維江。萬里相逢意使降。敢謂文人今有二。從來國士定無雙。翩翩真是佳公子。濯濯來過淺陋邦。不是蛩吟無好句。龍文已讓鼎先扛。

喜唐堯春樂宇至

一。夜驚雷雨。朝來見曉晴。故人今日至。春水昨宵生。燕試新雛羽。鷺啼舊友聲。論文吾不愧。何必定要盟。閒來

不是閒人不解忙。閒來惟恐失春光。天晴鷺報楊花落。日午蜂喧菜蕤黃。事歷安危生古慕。交因貴賤起今傷。忙中細檢平生事。惟有青山味最長。

重至鵲鴿寺

畢竟山中氣味宜。重來不覺嘆淒其。逢人不解虛心竹。入世多慙衛足葵。載酒誰過楊子宅。窺園已下仲舒帷。壁間遍覓留題句。雨打風飄不記誰。

農父詞

負郭幾頃田。編茅幾間屋。昨宵時雨至。流水滿溝瀆。呼兒迎晨起。且復駕黃犢。新苗纔幾日。冒土滋長育。出門扶竹看。微綠已滿目。力作不我負。佇待秋成熟。

牧童詞

奕世爲農家。頗念牛力苦。既耕亦且種。原上草方膺。大牛穿林去。小犢鳴遠浦。牽牛浴前溪。水淺不及肚。馴擾既可欣。相觸亦不怒。日暮騎牛歸。遙村笛無數。

開制軍秦觀風錦江書院賦得四時最好是三月得三字

韶華傳令序。美景恰幽探。總計時惟四。欣逢月正三。芳菲遲日麗。淡蕩晚春含。修禊臨江上。流杯向洛南。紅粧濃欲褪。綠蓋遠初涵。柳暗看穿燕。桑稠恰飼蠶。草薰憐益母。花媚愛宜男。遙憶華林宴。高吟興正酣。

聽呂桂亭林鼓琴歌

漏滴桐庭月東出疎樞峭風打燭忽然逸韻響東廊四壁無聲清且肅錦城絲管促繁音琵琶笙笛爭  
蕩淫誰將十指朱絲拂一彈頓覺清人心呂子卓犖操風古焚香爲我按歌譜冷冷梁上欲停雲矍矍松  
間疑驟雨忽似高岡鳴鳳凰啾啾百鳥不敢翔又似龍吟水飛立龍吼鯨吞皆屏息一聲在高山一聲在  
流水請君勿再彈盡善復盡美今夕乍聞君子聲十年躁氣於此平更欲同君大海去看君瀕洞移我情  
初夏病起

一春病過雨方晴徐向新簾竹裏行乳燕出巢飛尙弱眠蠶食葉輒無聲酒因氣促醉常戒飯爲脾虛飽  
不成肘後仙方如可得欲求思邈學長生

### 古意

管寧名三龍華歆亦居內白眉名三常馬謖亦復在輿論亦難憑忠奸合成隊昆弟無間言賢愚亦未汰  
覈實終難蒙虛名究誰蓋所以鍾太傅復生毓與會  
偃松無挺枝曲水無直流惟其枝無挺能免斧斤搜惟其流無直亦少衝決憂嶢嶢故易缺皎皎故易污  
剛乃禍之本柔乃生之徒老子五千言此理終不誣  
明鏡藏匣中不拭鏡不明燭光照庭內不剪暈復生妍媸本有判黑白何難分一旦失明照玉石皆見焚  
反將有用器視爲勿用論

天地生萬物有一必有二人工造百貨有真必有僞等是天所生或器或不器等是工所售或貴或不貴

物本是而非。價相同而異。幽莠與禾齊。鷲牛與虎類。自非灼見人。罔不互軒輊。鄭聲亂雅樂。聖言所嘆喟。聲樂猶不妨。文章亦此累。

庭前一李樹。枝葉何榮榮。下有藤附之。相託以爲生。扶疎借恩光。延蔓及初萌。歲久根蒂固。梢刺遂縱橫。蓬蓬出其上。朱紫紛相爭。李花雖潔白。不得如瑰瓊。顧爾亦無悔。本鮮則哲明。樹竟終不悟。枯朽隨飄零。吁嗟此足鑒。此樹何重輕。

題何愚庵明禮調鼎圖

君不見太白漂泊黃河間。挂席欲進波連山。一朝待詔金鑾殿。御手調羹供奉班。又不見世人不識東方朔。元是人間老蝙蝠。大隱金門侍玉壺。鼎中貯得仙丹籙。人生不遇萼綠華。便當勾漏學丹砂。修鍊未通三島路。烹調豈到五侯家。何人掉頭似巢父。琴劍隨身不肯住。門泊萬里槎。問君何處去。弱水東游是海門。沐髮滄溟朝陽盆。更欲西行沂河漢。直探星宿踰崑崙。從茲心不繫。知君百無累。展素接混茫。忽動滄湘意。我亦江湖泛。邇來無緣不得到蓬萊。十二瓊樓空悵望。三千玉女解徘徊。丈夫不能龔鯢取榮供妻子。又不能仰看屋梁長如此。何必更遭飛燕譏。庶幾去作王母使。我思問鼎固知非。君如後理幾時歸。玉漿倘惠故人飲。佇看茅龍兩兩飛。

送柴豹文邦直赴羅江楊明府幕

杜甫客居巖。陸游官至蜀。陸以獨身來。杜兼攜眷屬。君自浙東至。館我南村塾。絃續東家許。住久西隣熟。

多聞吾不友。直諒我誠服。我傲似螳螂。君常戒滿覆。我鈍如癡蠅。君敏叉手速。自謂平生歡。寧云過相督。今君又欲去。何日轉歸轂。我聞求宅者。固惟隣是卜。人生少知己。得一已云足。胡爲棄若遺。殊覺不我穀。握手各無言。更盡盃中盞。

己卯榜後奉高白雲命偕張霽孟邵姜錫蝦張那仲陪閔峙庭周立崖兩座師遊草堂寺卽席賦呈草堂高宴得追陪。郊外從遊笑語開。天下詩人歸沈宋。座間名望仰歐梅。樽林籠竹叨隅坐。食葉銜枚愧不才。怪道錦江秋轉麗。滿城桃李正新栽。

### 南星鎮果親王墨松歌

親王畫松有仙骨。畢宏韋偃兩超越。偶拈墨筆掃青松。百尺霜皮挂東壁。蛟螭蟠拏撐碧空。雷雨淋漓垂空蒙。屈鐵陰森夏寒月。高枝慘烈來悲風。平生見畫亦無數。對此恍與精靈遇。遙知玉駕駐空山。烟雨淒迷得心處。卽今深護碧紗廚。憑軒恍若丹青無。不須更問元都鄭。好去同摹峽蝶圖。

### 庚辰

#### 岐山縣元日

客路逢元日。他鄉長一年。春波添渭水。曉色入秦川。買餅家家送。門錢戶戶懸。故鄉兒女好。遙憶拜堂前。平定西域恭紀八首并序

乾隆乙亥年二月。上命兆惠爲將軍。富德爲之副。討平準噶爾。關地二萬餘里。奏凱回朝。

執戟登壇總舊勳。倚天長劍靖妖氛。賜騎近接飛龍廐。分衛遙傳控鶴軍。號令六丁驚霹靂。指揮八陣走風雲。何須揭穴臨槃木。諸部先愁鼓角聞。  
萬里沙塵磧霧收。軍門入夜唱涼州。前鋒早斷匈奴臂。後寨先懸寡母頭。月黑千巖屯虎豹。風清萬竈擁貔貅。君王務建犁庭績。一破諸臣築室謀。  
焚巢豈教鳥飛高。破竹功成總不勞。交趾已騎三象至。單于敢跨六騾逃。龍沙夜採于闐玉。虎帳晨盤大食刀。莫信虜兒多反覆。神機早自析分毫。  
試看傳檄定諸番。勒石燕然豈更論。三箭梢雲驚白狄。一騎踏雪問烏孫。狼胥山外無烽火。鵬撈河邊有戰魂。須信天威從日下。來瞻北極斗杓尊。  
大將馳驅荒落邊。經營屯戍白山巔。農耕蒼嶺三春地。兵過黃河二月天。自昔和戎誇魏絳。于今出塞笑張騫。貳師不用長征戰。早見名王款右賢。  
機槍掃盡暮雲黃。日閃旌旗出大荒。域外詔歸班定遠。營前爭拜郭汾陽。舊聞慣戰青羌卒。新看從戎白霽王。從此洗兵臨可跋。浩聲音門何必問沙場。  
塞谷陽回草木舒。邊庭喜氣盎春初。殊方盡望蟠桃使。降表連收貝葉書。首宿新看肥塞馬。芻蕘舊聽憫河魚。投鞍戰士縱橫甚。鐵甲行披勇有餘。

么馨何異井中蛙。蠻觸空爭兩角蝸。萬國誰能遲禹會。九嬰甘自伏堯堦。遠來瀚海知稽首。歸去流沙識聚骸。今日方欽神武略。書生何事議珠崖。

### 大風渡黃河歌

狂風動地沙如霧。行人望見黃河渡。轟轟波聲白晝聞。浩浩不息東南去。我聞黃河天上來。驚濤巨浪相喧匯。迢迢一綫眼中起。千里萬里聲如雷。曉來北風急如駛。河伯勃怒蛟龍起。咆哮直入滄海大。日月簸蕩珠宮裏。豈是三時葱嶺雪。化爲桃花渡頭水。我思崑崙山。河水從中開。山高二千五百丈。九折乃達軒轅臺。世無張博望。安知星宿在何隈。却笑河上看河人。竟欲捧土填孟津。古今事勢亦非一。臨淵結網徒艱辛。嗟乎安得風息水亦息。我雖不渡渡亦得。

### 鄴中懷古

鼎足還餘魏室基。臨漳遺事祇增悲。生平欲表將軍墓。死後空留妓女帷。狐嘯芳林烟滿樹。蛙鳴元武雨平池。只今銅雀俱休問。戲馬臺空又幾時。

### 謁楊忠愍公祠在容城縣白河鎮

孰爲忠愍孰奸邪。同是書生一念差。縱使無文非孔雀。明王元美鈴山岡樂府。孔雀雖有毒。不能掩文章。誰能有膽當螭蛇。此時正氣歸遺廟。當日香風遍鎖枷。取義成仁男子事。汝曹底事太咨嗟。

### 張桓侯廟在涿州忠義店

古來名將孰如侯。畢竟還君第一流。姻婭君臣同故里。姓名叱咤壯千秋。必逢漢賊方瞋目。既遇將軍肯斫頭。若比中興圖畫像。雲臺諸宿盡無儔。

滄州署中和同年檢討張鶴林署見懷元韻

乍見鴻書眼倍明。開緘已屆月嘉平。人如晚菊霜能傲。詩似寒梅雪妬清。欲問舊遊千里隔。初來新地百愁生。錦城記得同歡處。共上華筵賦鹿鳴。

戚繼光燕山紀功碑歌在密雲縣北門外八蜡廟文爲兵侍汪道昆所撰

檀州城東八蜡廟。十面穹碑倚山嶠。稜稜兩座峙堦楹。轟轟一綫當邊徼。當年誰此勒奇勳。居民指說戚將軍。坐營家法朝中少。殲倭雄聲海內聞。憶昨俺荅初通貢。土蠻十萬聞弦控。將軍新自海邊來。意氣不與單于共。朝廷方重薊門兵。萬疊龍旗耀日明。炬點笈筦操馬器。雷聲轆轤走車營。是時天子方倚畀。十六年中靜無事。密雲聲勢冠諸邊。司馬鴻文留姓字。一自旄麾嶺上遊。轅門舊卒皆白頭。不聞西域留任尙。却憶東吳守陸侯。卽今人去高山隕。將軍大樹飄零盡。無復貔貅重野宿。空餘樵牧驚殘盾。我來不禁日摩挲。剩欲拋書請荷戈。旁人撫掌輒相笑。壯志功名奈老何。

密雲縣省親以出口未見住大悲菴次日回京

禮少趨庭過。騎因定省乘。不知先出口。空自撫愁膺。帶想十圍減。城看百堵興。悵然却歸去。負米竟何曾。時修密雲城工已竣。

聞張雲谷病

見說侵晨尙臥帷。司閤謝客據常規。未能饋藥慙康子。莫使援歌拒孺悲。雞肋一官同此日。鴈書千里到何時。從來別駕皆聊借。莫遣安仁兩鬢絲。寄時借補光州判。

寄懷王心齋紉一同年時檢發安徽心齋江寧人

霜天木落正冬初。偶向天南賦索居。只怪甫離千里遠。如何不寄一行書。同寮應有膠投漆。大吏能如水得魚。更喜金陵故鄉地。歸家只用半帆餘。

比部孟鷺洲同年用張鶴林見懷韻寄示再和答之

同輿憶昔赴春明。豈料今爲國決平。自分兼葭難並倚。相形玉樹本來清。升沉未必真前定。資格旋成老後生。看取明年腰下劍。雌雄仍共匣中鳴。

夜雨

晚雨飄蕭陣陣涼。驚聞風樹擺琳琅。一窗燈火飛蛾撲。幾點芹泥乳燕忙。急遣兒童收晝局。愁看客子攬衣裳。寒天束手渾無事。獨向高天數雁行。

雨

日色催晴風色慳。天公醞釀作愁顏。前村雨樹濃於墨。一幅堆雲大米山。

和傅中丞巖溪栢臺種柏韻二首

登臺領繡衣。丰采老堪愛。稜稜執法時。觸邪直似豸。閑來坐南榻。風流緬前輩。古栢森成林。羣鳥朝夕會。霜皮溜白雨。老幹聳青翠。勢參雲霄表。風生臺閣內。有時滋秋聲。匝地發奇籟。以此樹百年。無繼吁可怪。歸來謀種植。幸有老成在。

先生栢作心。摧折諒不能。邇來手種栢。一一虬龍騰。我聞古遺直。獨坐稱中丞。埋輪與折檻。沒則爲神靈。卽看青銅柯。沃雪益以貞。豈非百怪護。晝夜守霜廳。但使高節彰。坐嘯亦有情。烏棲定何處。夔龍今在廷。他年應有客。摩挲新栢庭。

七夕篇

絳河清淺秋如練。錦棚瓜果羅清燕。垂蘇帳裏夜相邀。穿鍼樓上年相見。此夕深閨陳氈氍。此時小閣尋蜘蛛。飛雁月斜度銀漢。流螢夜靜輝金鋪。就中別有傷心妹。思失遠戍龍沙砦。五色雲霞剪不成。三更風露寒難拜。天南天北鎮相望。誰惜今宵乞巧忙。隔窗戲遣鸚呼侶。捲幔愁看鵲作梁。雙星渡河會何處。美人獨立頻遲顧。緱氏山頭人未還。銀洲界外軍方駐。轉瞬闌干北斗低。雞聲爭向汝南啼。最憐挂布阮家子。亦似停機竇氏妻。

安肅道中

霏霏小雨麥初黃。撲鼻風傳餅餌香。村巷誰家倉庾滿。空餘碌碡臥斜陽。垂楊蓋路草平堤。帽影鞭絲襯馬蹄。深巷閉門人正倦。酒旗飄出小橋西。

慈航寺贈無本上人寺扁爲方問亭制軍所題

禪房門對石橋開。滿徑槐陰罨綠苔。名寺必須名筆額。後僧偏拒後人來。千家野色沙邊迴。一片河聲樹裏迴。正擬聽他齋後懺。與人告我夕陽催。

松林題壁

濕路惺忪雨。遮山澹淩雲。東西菴未到。大小徑先分。有意鳥相喚。無心樹已焚。入門吾已悔。求懺不須云。

琉璃河

油油綠岸長。菰蔣野外風。收估客櫓。却憶石湖橋畔句。琉璃河下看鴛鴦。

孤雁行爲涿州牧吳鳳翥節母太夫人作

南來孤雁何嗷嗷。白雲叫斷霜天高。人間隻影誰不有。孤雁一鳴自搔首。當年節母守空閨。月冷風淒志不輸。一自青年破鸞夢。頓令白首如鴻孤。當年本欲殉夫死。未了其如腹中子。淚洒黃泉指此心。翠栢青松誓終始。從此日奉舅姑魚。小雛呀呀能讀書。子旣成名孫成列。四十年來如電掣。錦堂春晝開瓊觴。猶對華筵淚鳴咽。朝來忽見孤雁翔。口內不言心自傷。雁乎雁乎吾語汝。切勿重敘從前苦。錫爾誥命旌爾貞。世間孤雁誰及汝。



# 童山詩集卷七

辛巳

琉球刀歌并序

爲王夢樓先生文治作。先生丙子同全侍讀穆齋。冊封琉球所得。雪夜出示。要余作歌。

先生雪夜招我飲。寒光逼座半酩酊。興酣出示琉球刀。挂壁魂飛斬蛟影。黝魚皮室象鼻條。龍雀夏環犀利等。晶英射目寒生毛。正色捧視冠先整。爲云前年駕海航。同槎聊得張騫肯。翻然直渡姑米洋。使舟觸礁紛斷綆。颶風大作黃蛇浮。齊呼天妃向東請。忽見海面一燈來。如烟籠罩神光罔。須臾護送馬齒山。那霸港中始無警。此邦本鄰土。噉喇七島倭人爭鬪逞。割髭男兒好佩刀。往往不勝先刎頸。出鞘光如雪。一團風聲乍過失。腰領可老贈我不敢窺。百步遙聞血腥冷。傳聞日本初鑄時。煅鍊陰陽聳精緊。磨出七百七十鋒。白晝陰森擊雷霆。帶時鑲鐵曲作柔。用日如囊錐脫穎。至今匣有悲號聲。時時霹靂驚夜永。不信試看一摩挲。白日晶晶天炯炯。我聞此言膽爲寒。便欲挾刀斬強梗。卽今邊塞多烽塵。安得一揮萬方靜。歌罷放刀出門去。門外雪花避光景。

兩癡老行

我昨夢向東海東。忽跨黃鶴騰長空。函谷關頭遇老子。鬚眉似雪行似風。餌我丹砂授以篆。招我攜鋤斫黃龍。赤城絳闕參差是。弱水萬里飛如蓬。方瞳道士呼爲友。槐山老父許還童。旁有二老撫掌笑。倘能如此我得道。回首問渠何姓名。秦皇漢武兩癡老。

東門行

巍巍大第城門東。文柏爲梁泥粉紅。風臺月榭若雲霧。半空架起蓬萊宮。令公功高寵無比。象牙犀簾常晏起。粉黛叢中千毛嬙。蒼頭脚下百珠履。鳴鐘讌客春光賒。猩唇熊掌侔天家。美人善作掌中舞。術士能栽盆內花。繞座無非優雜輩。興酣別喚彈箏伎。蜀中新到野狐歌。楚外更傳王豹至。子夜歌殘席未終。豈知平地起兵戎。堂前頃刻生荆棘。羅雀門外多秋風。君不見前張陳後蘇史。翻雨覆雲總如此。

邯鄲行

妾家本是邯鄲妓。明粧墮馬冰肌膩。繡襦窈窕彈朱絃。龍婉鸞驚舞交翠。折腰錯落鳴六銖。合彈小轉勸君醉。勸君醉。冀君憐。願爲天池並帶蓮。鴛鴦雙雙飛上天。君憐不憐妾自知。無端紈扇秋風吹。夜來多少傷心事。背立銀屏淚暗垂。

壬午

秦鏡歌爲董東亭作

我聞自漢以來古鏡四十九。惟有秦鏡其形方。相傳名爲照骨寶。厥制始自秦始皇。高五尺九廣四尺。照人五臟無躲藏。傳聞宮人起邪念。照卽倒影心膽張。不知董子何處得此鏡。言自無勞儻奚石岸旁。我思軒黃液金作神鑑。凡十有五已淪亡。後人偶或得其一。制度想像猶可詳。先以八卦定八極。後以四靈位四方。一十二辰環其外。二十四氣羅中央。周漢以後形各異。圓者象天方法地。周天則有廿八宿。拱位三神與八衛。或鳳飾而龍蟠。或鱗甲而羽毳。或嘉禾不與合璧。或比目與連理。或中虛而謂之挾鑑。或形銳而名以浮水。或肖五嶽真形圖。或象玉女舞乍起。其餘光背花背與滿背。嵌金嵌銀與片子。俱須清瑩徹中邊。形影不改斯爲美。況聞方者品最下。何況嬴氏失天紀。博物雖或張華先。貴重不必秦皇始。君不見宣帝有鏡照妖魅。常以琥珀盛諸笥。天神所福得佩之。從危獲濟登大位。又不見天寶初進揚州銅。爐火光中盤真龍。詔以五月五日鑄。鏡能行雨復行風。還君此鏡三歎息。何必如鬼復爲蜮。我有寶鏡名仁壽。俟與金鑑一齊奏。

### 古柏行

孔子廟柏青龍葱。托根不與尋常同。霜皮黛色株數十。風枝往往鳴商宮。勁節亭亭互向背。儼如佩笏森相對。小猶合抱況其餘。濃陰交接亂明晦。其旁一株勢尤殊。蟠鬱雲氣何模糊。歲月微茫猶可辨。許公所植神爲扶。雷霆白晝蒼龍立。元氣淋漓雨聲急。斑鱗剝落丹霜秋。百片青銅光熠燿。永嘉枯木已千年。泥封刀割空連蜷。澤澤之光竟何在。安得突兀撐青天。當時元儒誰爲首。千載薪傳推此叟。培養良材豈無

意要與孔楮爭齊壽。至今偃仰高拂雲。流脂落實香芳芬。飛燕年年雲外見。吟鸞夜夜月中聞。成均弟子雍容至。摩挲想見先賢意。蒼幹樞門映日寒。誰人不向此中庇。君不見漢家崇臺何森森。青棠赤棣皆成林。材非骨重誰能器。人到寒凋始見欽。國子先生偶來止。摘葉攀枝吟不已。勸爾諸生卽爾師。豫章七年正如此。

石鼓歌

文宣王廟千仞宮牆尊。肅若九重彤庭嚴。丹闈雨旁古槐翠柏相環夾。中間位置石鼓臨戟門。傳是周宣文時史籀作。旁紀漁狩中載策命諸臣論。從甲至癸文百二十字五百。微辨車馬鯉鱖凡六言。其餘彭亨菌蠢半隱霧。蒼蘚剝出玉釵刻漏痕。紛如松藤轆轤大虬走。坐見草蟲阜趨相隲蟬。冰蛇雪鼠蜥蜴不知數。中有萬歲蟠龍昂首噴。古來鳥跡蝌蚪亦半妄。獨與銅盤彝鼎光義軒。豈非周家守銘吉金用。略同子虎父乙父已廬。我來學省官舍初釋菜。側望杏壇禮器思攀援。摩挲古物猶見先王意。但覺雷紋饕餮氣壓舉已樽。巍如金馬銅駝屹不動。弗用螭鰲承負自雄蹲。曾經風雨缺齧閱千載。百神呵護晝夜風雲屯。細思物理獨占萬古壽。不畏昆明歷劫經秦燔。從來神物往往藏大澤。顧此片石何處窮根源。憶初女媧煉石補天鬼夜泣。墮落琉璃五色輝。燼燉化爲南山嶠。崑崙千萬丈。蒼茫氣勢勃欲登崑崙。自從巧匠剏中斷山髓。混沌忽死不救地媼魂。琢成神寒骨重天廟器。始覺寶光照耀流乾坤。當時吉甫作頌泐偉烈。萬國芾芻同會相趨奔。文成嵩高下射漆沮水。升阜羣醜競進頭如龜。大開明堂御賓以酌醴。擊鼓歡騰聲

如海波翻。迄今想見東都車馬肅旌旆。有如白雉寶鼎光紛縕。年湮不記維戊寅午日。漸教俗眼玩弄加手捫。後來雍州城南委榛莽。空餘蛟鼉鸞鳳哀煩冤。雖然幸免摸搨傷皮面。却被樵夫牧子拋荒村。歷漢及唐至今乃顯燦。有如日月光天炯不昏。其間大軍巨艦凡四徙。畢竟安貼安置太學欽繚垣。譬如窮儒久處破屋見星斗。移以大廈必自深啣覆庇恩。君看正襟危坐體自正。肯隨諸子拱手禮拜駢肩跟。方今羣彥莘莘冒楚楚。八方騏驥各各爭雲騫。安得博雅江淹識家器。不教鍾山旬服傳祢孫。若問吾儕食古誰能化。或者瘦羊博士今尙存。

送大廷尉顧息存先生汝修冊封安南

南交萬里載威靈。祖道都門騎暫停。陸賈談天推漢室。臯陶拜命出虞廷。馬嘶銅柱蠻烟暗。鼉吼金波瘴雨腥。後夜客槎何處望。南溟應見斗牛星。

寄永清丞陳韞山琮

地邇京畿密。年來報最頻。誰言爲政樂。翻似在家貧。樹接盧溝遠。梁登海淀新。治河聞賈讓。不必讓前人。

卓文君銅印歌爲朱青雷作

青雷山人蒼籀徒。秦篆漢隸紛笥廚。就中銅印製尤古。傳是文君刀筆摹。不知何時初出土。估人云出成都府。乾蘚菌蠢字模糊。射人古綠精光吐。清泉洗出名尙留。想見如荑女手柔。其紐爲龜脰左顧。賤售不費蠹蝸收。憶昔王孫女初寡。遠山不借眉黛假。鳳兮一曲求其凰。千古風流屬司馬。夫旣能爲犢鼻褌。婦

亦當墟倚市門。同里未逢楊得意。閉門先絕卓王孫。一朝駟馬題橋去。玉堂給札君王侍。乍聞殿上賦凌雲。已見蜀中檄文至。其時此印刊何年。共說夫榮妻比肩。痕深似倩麻姑爪。篆古還同玉筋鐫。豈知丈夫多異心。茂林又復有挑琴。綠綺當年彈已絕。白頭此日空長吟。由來意氣難如願。一朝委去終身恨。篋裏空存封禪書。填來祇作酒家券。只今事隔幾千秋。不虞此物存荒邱。煩君拂拭苔衣繡。印取桃花紙上油。

# 癸未

## 蒙恩點翰林院庶吉士恭紀

領髭敢詡掇巍科。是科會試。余中第二人。獻策彤庭答拜歌。兩載抽毫趨鳳閣。一朝曳裾上鸞坡。散班玉筍青衫少。仙侶金華黑髮多。盛代崇文真忝竊。小臣報稱應如何。

## 涿州送大人回川路遇宋四觀光

涿州城東日將西。下馬相逢握君手。問我倉皇何處來。送父不辭百里走。我之來。樹上烏。君之去。水中鳧。凌空飛鳥亦常事。試問如鳥反哺無。

## 送別沈虹舟先生李祖惠歸吳江

北風吹沙塵土黃。師弟牽衣餞別觴。別觴未盡出門去。獨騎瘦馬踰河梁。先生古文日星爛。氣排山岳光糾縷。至今元氣留肝脾。孔鼎湯盤無敢玩。豈知蹭蹬無縱鱗。名垂金石身艱辛。文場百戰皆第一。此才竟

教淪風塵。丈夫抑塞不得志。焉能齷齪供驅使。飄然却向江東去。扁舟茅屋吾歸矣。歸來應上受經臺。白鹿使者于于來。他時倘遇召班馬。莫教著作老奇才。先生時以高安令改教授。故云。

## 甲申

和陳勾山太僕跋東坡與龍節侍宴真蹟用米老韻呈座主周立崖先生於禮

先生字法精入骨。笑衛夫人費日月。愛學東坡換羊書。若鋒出礪刃新發。嘗言魯公筆太肥。又言張芝空草割。昨朝購得清虛堂。有如聽江初得法。我聞子瞻酷愛王家兩行十二字。野鷺家難得勿同此意。當年片紙不許藏人間。至今萬金始得收中秘。先生慕古雖隔世。鼻祖遙遙接蘇氏。我亦以指畫破衣。璧美貌妍總非是。

## 送別王夢樓先生文治由翰林侍讀出守臨安一百韻

虎綬新承命。鸞坡舊集賢。受知緣鄭重。話別故纏綿。夫子鍾江口。家聲起海堧。青緇三世遠。丹篆一枚圓。東箭材原貴。南金質自堅。蘇歐文似鑄。燕許筆如椽。繡虎工于織。雕龍不是鐫。銀鈎追逸少。玉唾揭公權。翰墨千秋寶。文章一日傳。席看槐市奪。矢已柳枝穿。共訝鐘彝器。旋陳東帛箋。朝廷行冊遣。幕府早虛延。持節羣推武。乘槎遂附鸞。陳遵工尺牘。阮瑀掌書箋。素結三山願。從茲萬里沿。揚帆撈海月。擊楫破滄烟。鼉眼顧波晃。鰲身黑浪漩。國王排雁齒。侍婢燕龍涎。綺席花藍舞。黠堂竹拍筵。伶僮紅錦襪。歌伎翠珠鬋。

金埒瓊瑤響。銀盤海錯鮮。十行騎紙馬。七宴逐麋猿。蠟炬奔趨送。龍宮禮畢虔。雲濤原不測。風浪竟言旋。詩遍鷄林賈。名高鶴上仙。碎琴方擲地。破壁遂飛天。玉筍同時雋。瓊林獨占先。作元張五處。對策董三篇。主酒陷綾餅。探花踏繡氈。驚扉榮禁籞。鳳檢耀金蓮。珥筆靈和苑。濡毫太液泉。論文參赤管。纂史訂青編。華國材爲棟。擎天玉作礪。前賢存汲引。後進敢流連。憶昨南宮選。時承北學員。龍門千尺峻。雁塔幾人聯。鎖院蠶聲夜。銜枚蟻戰年。一枝寧是桂。片玉未爲璇。曳白知無分。垂青幸有緣。瞻韓心自切。御李幸無愆。紫殿分丹禁。青宮接畫軒。趨承時踈足。陪從敢差肩。同衣冠盛。逢春輻輳駢。羣公如雨集。諸子應星纏。簾爲敲棋捲。帷因作字褰。烹茶晨謖謖。擲擲夜園園。留客嘗晨釀。援賓試暮饘。有時徵玩戲。無事鬪便嬛。舞罷廻紅靨。聲遲斂翠鈿。燭殘歡倍劇。歌歇髻頻偏。的的誇粧靚。番番博笑嬌。喧嘩翻剩席。酩酊上歸轡。逐逐無離所。朝朝詎舍旃。酒罍非邈若。宦海忽茫然。螻自身安屈。蛟寧老作陸。中樞推鄭滌。外任重胡詮。舊著書三十。新增秩二千。從容辭北闕。迤邐出南瀛。紫闥橫袍笏。朱幡奪錦薦。路遙金雁驛。舟過碧鷄川。鎮柱標雄麗。金沙漾漪漣。瘴雲昏浴象。毒霧站飛鳶。獐女輸文具。苗民緯木綿。夷風雖洗染。蠻俗頗腥膻。去禁來廉范。驅邪走竺乾。隨車應有鹿。逐惡豈無鷗。揮吏莎庭靜。留僧竹閣禪。琴聲簾寂寂。印色草芊芊。雨後栽花樹。霜前課稻秣。此時風景異。遙覺歲年過。憶故看雲立。思交對月眠。山川頻悵望。風月想安便。狂狷應相念。癡頑幾日痊。俗塵勞拂拭。陋體詎翩翾。賤子慚桃李。才原愧杞楹。幼思連獻楚。壯悔□遊燕。已作籠中鳥。真成殼裏蟬。酒邊空跋扈。病後苦虛孱。木直原招忌。膏明只自煎。未能心抑抑。祇是語譏譏。

放誕稽康懶。橫豪米芾顛。夢魂疑化蝶。鄉思感啼鵑。瓦礫難攻琢。芻蕘合棄捐。空羣逢伯樂。持斲藉輪扁。門立程公雪。莊荒陸氏田。助山羞細壤。輸渤効微涓。養器培松柏。知心別蕙荃。丁寧行莫玷。提命過終悛。含意叅心契。忘形解道筌。擬將觀後效。庶免蹈前愆。自喜洪爐鑄。常將品彙甄。頓然離水鏡。何處照媿妍。譬彼孤飛翼。誰憐百足蜎。先生今去矣。弟子益儼焉。史館思錢象。蒼生待謝元。清方聞一鶴。占定象三鯨。經術看宏展。才華必廣宣。盛遊當再續。名望豈孤懸。絳帳終當侍。襜帷或暫褰。飛鴻音定早。莫使思長牽。種芝行爲唐芝田作。

君不見芝田種芝如種穀。九畹苗芽抽或或。手攜鴉髻鋤未終。一卷黃庭樹根讀。我聞蒼山五百年。風吹石髓如鐵堅。若有人兮餐雲氣。便騎白鹿凌虛烟。今君何處拾此七明九光之奇種。但見朱柯赤箭紛鈎連。得毋路遇綺園叟。示君竹刀斫雲母。萬歲蟾蜍味如藕。又或崑崙訪蔡誕。夜呼祁孔賓爲伴。敲折紫藤枝。無算不然何爲貌。此玉頻清而豐。彷彿看似商山翁。恍然車蓋擁宮闕。疑身誤入華陽中。我亦丹邱客。思隨赤松子。安得從君過銅池。生啖黃龍飲其髓。

聞祝芷塘德麟消息二首

昨傳吳地信。猶滯閩閩城。月夜誰家艇。春深何處笙。相思千里夢。同有五湖情。漸看青蕪長。哀鴻又北征。鹽官濱海處。聞爾有家園。樹色濃圍屋。潮聲夜到門。黑頭他日事。青眼幾人存。年少今才子。聯床若箇論。贈弟桂山天英。

與君生同里。聞名未謀面。謁來京師遊。選謁始一見。意氣何飛騰。神采爛崖電。落筆翻水成。讀破知萬卷。譬如換凡骨。力藉仙丹捍。不惜百迴吟。極口莫能贊。此才揆天庭。應待金閨彥。空抱千里志。無媒竟誰薦。昨與君縱談。明習若素宦。知君樹立然。懷珠非自炫。我生寡所偕。素性復疎慢。得君不羈人。令我狂欲旋。情誼真古人。膠漆誰能間。永當對風雨。詩酒達晨旦。

送蜀闈房師于東臯中行由隆昌陞徐州司馬

徐州佐治沐新恩。儒雅風流道範存。此日喜陪司馬席。當年愧領小龍門。已卯調元以第五名領房首。行看綠樹檐帷遠。望到黃樓絳帳尊。我是師門最遲弟。不堪老別暗聲吞。

六月初一日雨後偕侍講周稚圭升桓成進士城邀集舍人沈南雷士璋齋中分韻作歌得燈字

今年五月多霖雨。垂檐白練如穿絙。吹帷注面風習習。蕭蕭默坐成癡蠅。念我休文南隣北。泥沒屐齒何由登。曉來城上鴉翻樹。豁見西山霽色澄。清晨欲往徑命駕。敲扉不待雙童應。主人攤書正高臥。笑起握手欣來朋。燕京客舍苦無事。相與大叫呼憑陵。打門忽報周公入。軒軒意氣何飛騰。座中成子殊駿犖。鬪奇射覆無不能。相逢酣叫傾五斗。十千沽酒真如澠。人生對酒不fast意。百歲轉瞬如風燈。男兒窮達自有命。但須胸次清於冰。何必低頭附炎熱。齷齪渙忍求哀矜。疎懶從教官長罵。狂歌那禁旁人憎。維時徂暑苦蒸鬱。黑蜨不見焦烟凝。黃沙撲扇汗如泚。陰桷移坐前廳棚。興酣呼出雲中月。滿天星斗森孤稜。醉來起舞鐵如意。眼看屋角濃雲崩。咫尺雨雹愁僮僕。催歸街鼓聞鑿鑿。夜闌得句雜夢寐。急追好境書溪藤。

明日示君應咋指。酒語無付詩胥臆。勸君欲飲徑相覓。邇來酒價方陡增。

放歌行送別別駕唐芝田

侍陞

之江南兼懷夢樓先生

尊酒勸君且莫罄。我試放歌君姑靜。歌長聲高響入雲。四座爲我傾耳聽。憶昔少年輕遠遊。出門四顧無九州。結交盡是平原客。受辱不作淮陰侯。人生三十猶年少。飛騰變化誰能料。却憶去年黃公壚。日與吾輩同歡笑。子居巷北我巷南。得便卽覓不用召。袒跣呼盧靡不爲。醉歸屢被官長誚。當時程魚門徐燕遠。曹竹虛宋小岩擅風流。丹徒夫子文采尤絕妙。邇來聚散何紛紛。千里萬里傷離羣。□□門前君送人。今日門前人送君。目斷南天鴻雁過。垂楊走馬趁斜曛。酒亦不可盡。歌亦不必續。君不見龐鳳雛。別怨方能展驥足。

送朱子穎孝純之蜀作宰

十年聚首興何長。分手無端各一方。塵世知交人寂寂。天涯客路海茫茫。猿啼萬樹褒斜月。馬踏千峯劍閣霜。自古詩人例到蜀。好將新句貯行囊。此行攜鶴歷蠶叢。走馬盤關一綫通。棧樹遠分殘雪外。人家多在夕陽中。故人他日思今雨。大雅當時想古風。到蜀若煩開石室。也應化俗似文翁。

子穎子歌

子穎子穎髯如戟。眼中無物氣無敵。二十年前早知名。驕驍作駒汗流血。朝來作賦長安市。一日碎琴驚

帝里拂衣不到七貴門。提筆何曾百篇止。去歲京華始識面。意氣形神兩相視。白日慘淡秋風高。爾時見君何雄豪。我聞詩人例窮蹇。失意往往追風騷。奇才抑塞古亦有。酣歌據地真吾曹。子穎子不見生入玉門之班超。不見東海騎鯨之李白。雲臺畫像竟何人。劍術飛仙爾亦得。何爲一上孝廉船。坐使金門空射策。龐公豈是百里才。賈生誰與問前席。昨日辭我之劍南。我是劍南未歸客。去住俱爲異地人。人生離合真無極。少陵去蜀仍蠶叢。天特遣君爲鏟關。故叫走馬錦江邊。要使清吟奪江碧。當今盛世奏雲門。懸器要須韶濩音。風雲際會君姑待。莫遣星星白髮侵。

送舍人徐蒸遠步雲回南

驚飈淒以肅。凍雪欲封瓦。寒鳥繞窻啼。似訴遠離者。我友慘欲別。號天泣如瀉。去去從此辭。晨裝催秣馬。雞鳴哭出城。風樹爲瀟灑。夢聽長鬚報。急送已在野。明知去必遙。車驅追亦且。道逢送者還。睚閔淚未下。寄語聊慰我。失聲爲暗啞。問我無飛翼。不如且歸也。何處望烏帽。京塵深沒踝。延佇知無益。徘徊自難捨。歸來覓鴻寄。愁吟對燈炷。

冰床行

北風吼樹樹欲動。雪滿城濛濛。爲凍曉起行人冰上行。歷歷冰床往來送。床走如飛不用漿。底蓋皆平几杙做。不蓬不帳坐來斂。僅可容人三或兩。一人負緯走如奔。恍疑直渡銀河上。造次不怕狐聽疑。玻璃琢就平於掌。大魚潛服不敢動。錯認江面蒲帆響。豈知名床却似船。船人叉手向余言。不見江頭船戶吏。斂

錢官司查點候如年。不如此船無用處。日暮得錢自歸去。

觀東坡興龍節侍宴真蹟歌并序

周立崖座師於上元節在琉璃廠購得東坡興龍節侍宴真蹟。是夜出示門人編修彭元瑞、汪新、及調元等共加賞鑒。同門請泐石以公諸人。至冬始竣。各捐一本見賜。因作長歌。

趙宋法書誰第一。東坡先生古無匹。棗木刊肥世鮮真。墨豬空笑盈綳裘。吾師立崖真好古。百金收購爲綴補。斷縑怪底等連城。由來瓣香蘇其祖。酒酣出示驚賓朋。千年遺墨復今覩。是夕百枝燈花開。高軒明月流金杯。開緘奕奕銀鈎動。光爭火樹輝瓊瑰。嗟哉至寶未湮滅。日月猶記興龍節。蝴蝶碎亂空復憐。頓使展觀三嘆息。憶昔侍講邇英殿。日高陪從東宮宴。黃繖西清賜玉壺。感泣金蓮夜歸院。玉皇灑翰無時無。漆光射天驚諸儒。紫薇草罷招贊普。袖中三十四驪珠。豈知文墨亦遭忌。九泉檜根能作祟。坐令此帖落人間。竟無片石傳後世。我師何處得此紙。空教金多貴人悲。傳觀石渠諸史官。及門亦得從旁觀。豈意慨然壽之碣。各頒一本工甫完。拜賜何啻千金璧。歸摹臨池水應黑。吾鄉宗派繼者誰。對此空令淚沾臆。

王夢樓先生命題城市隱居圖

□□厭塵居。反向城中住。豈真愛城闌。曾自無塵故。先生本仙籍。香案掌文賦。天惜斯文墜。降下玉堂署。城陰結茅屋。遍植皆花樹。獨酌理琴書。焚香脫巾屨。只此滌凡襟。何必山林住。乃知枕石流。要是捷徑路。聖朝無遺才。不才乃見棄。先生豈真隱。留爲隱者悟。

題楊妃春睡圖

華萼樓前春色闌。華清浴罷曉粧殘。別宮昨夜聞宣喚。傳道君王飲玉環。宿醒未解春眉蹙。扶歸皂帳人如玉。帶雨芙蓉起御床。正是海棠春睡足。寶釵斜墜綰烏雲。金屏烟裊香氤氲。日移磚影隨簾轉。風動鈴聲隔院聞。那知鼙鼓驚春夢。香魂錯認流鶯啼。深宮昇出錦綳兒。塵滿漁陽萬軍閨。可憐劍閣雨淋鈴。渭水東流不可聽。一自長眠馬嵬月。千載黃泉喚不甦。

送崔孝廉述落第歸大名

崔君鬱鬱不得意。匹馬走出長安去。未及五里十里程。折盡千條萬條樹。此時車馬如雲屯。此時俯首前趨奔。人投風雨晴時店。家在雲烟盡處村。崔夫子。吾語爾。不須更抱李鴈恥。不見鸞鳩榆枋搶。不見縱鱗羞盤委。六月之息一瞬爾。胡爲悼嘆在泥滓。崔夫子。請一觴。我爲長歌寬君腸。君歸倘去漳河上。好掬雲濤漱七襄。他年一舉挾雲漢。安知不在玉皇旁。

雷琴歌并序

朱青雷好琴。頃得古琴於京師。膠漆剝落。彈之有殊聲。令良匠開腹裁綴。腹中有大唐雷氏製五字。旁有宣和小印。其長三尺餘。頭曲如拱。其赤如新栗殼。斷紋隱起似虵蛇。有銘文。剝蝕不可識。考雷氏蜀人。其先有雷威。斲琴無爲山中。以指候之。五音未得。忽一老人指示曰。上短一分。頭豐腰殺。已日施漆。戊日設絃。則可鼓矣。如法斲之。無不佳絕。世稱雷公琴。其傳者有霄盛珏文迅諸

名。按國史補。錢塘沈振著一琴。名曰冰清。腹有晉陵子銘。書大歷三年三月三日上。底蜀郡雷氏。斷奉詔書。貞元十一年七月八日再修。士雄記。或謂晉陵子杜牧道號。篆法類李義山。此琴但言雷氏。而不詳何名。且亦無大歷開元等號。青雷素好古。豈亦有所據歟。又言銘文剝蝕。豈故滅其迹。以驚奇歟。宣和小印。据琴苑宣和殿百琴堂。有雷氏琴。則爲御府故物。亦未可知。但恐眞贋相參爾。青雷索余作歌。因據所聞以答之。

青雷示我雷氏琴。黑蛟踊出如奔霖。古漆無光捫不得。挂壁往往聞龍吟。細觀石軫損未理。蟲書漫漶記□□。欄桐埋沒不知年。市兒拾得鬻都市。買歸那惜東陽業。縮絲爲袋玉爲匳。小篆旁印宣和年。良嶽所藏毋乃是。我聞雷琴各有銘。宋人所寶皆題名。雷威造有松雪字。雷霄製有松風聲。玉潤名泉雷迅。九霄瑜珮雷文成。其餘雷盛與雷珏。不出靈開偕冰清。歐陽三琴蘇十二。雖無字號時世明。玉徽瑟瑟金徽蚌。品第一一皆至精。此琴何名復何代。不應剝蝕字全廢。但據琴苑小印爭眞贋。懔懔難爲對。况自徽欽南。燼來所見存者惟春雷。樊氏路氏俱劫火。底事雷氏猶餘灰。從來神物有靈氣。請君考定方珍貴。落花流水亦古琴。試看鼠畏與不畏。

### 送編修宋小巖銑回吳

姑蘇多佳人。艷者顏如玉。亦復產佳士。玉中比結綠。我友宋小巖。蛾眉等曼睩。若比西方人。定應稱二姁。可憐不字貞。與我通款曲。三載偕步趨。校書直天祿。有如雙飛禽。相聚水中浴。翩翩厲其羽。並頸時相逐。

昨日駕在門。告言返舊屋。執手爲躊躇。淚下不能續。奈何同心人。遠赴天一角。目逆而送之。何時手重握。相期臭如蘭。此外無他屬。

寄懷王夢樓先生六十韻

文章重知遇。世事感乖舛。秋風別河汾。雲散憶羣傑。緬昔初遇李。龍門何硤硤。逡巡我不前。立階敢踰越。先生徐進之。執手笑胷胷。師乎實友也。要在神交密。叩頭謝此言。此意銘於骨。向來荒學圃。抱甕方搢搢。春風一月坐。此情頗不屑。京師盛朋遊。還往豈能絕。譬如濁河翻。淮源各自潔。薰蕕倘不辨。終必歸隙末。朝廷方重才。揆藻各欲竭。我師鳴其盛。灝氣倒溟渤。於時奎星聚。穎川事堪述。建安七才子。曹劉我先怵。曹文植。劉種之。前輩真飛騰。勝事頗記晰。賤子虱其間。躁甚鼠失窟。有時學呻吟。有如魚刺乙。日枉高軒過。愧無李賀筆。家留瓊瑤詞。句壓岫嶠碣。豈知偶與奇。翻覆見顛蹶。當年執牛耳。登壇各秉鉞。別來黃公鑪。蕭條感華髮。武源董潮。倏已故。昨聞淚鳴咽。此才我所膺。詩在王孟列。天若假之年。大器成晚節。竟主芙蓉城。花落鵲啼血。逝者固已矣。生者復睽隔。小宋銑孝而純。母病祈藥訣。春輝不獲報。泪灑扶桑日。家對吳公楸。歸夢雲帆切。白塗徐孺子。步雲繼宗臣。而出獻賦來長安。飛黃才一瞥。試席見孤熊。交以立談決。劉蕢落第時。孟夏月在畢。銜淚拆家書。急買南歸柅。此別不銷魂。其心無乃鐵。迴憶蹇驢句。西風爲颺颺。燕京歌舞場。屢共金樽抹。每逢燭炮時。腸斷秋波溢。客歲往淮南。一官等蠅蟻。遙知定高眠。傲吏成坦

率子穎不羈人。朱孝純奇才屈受繼。侯門不低頭。甘臥潭潭室。吾師真康成。微賤得鑒拔。與之釜與庾。歸見妻孥說。嚴霜出劍南。雪棧流漸洳。此時到草堂。哦詩知抱膝。凡此數君子。東西走疲茶。有似擲沙散。恨無縮地術。茫茫雲際鴻。杳杳天低鵲。明月元度思。秋風茂陵渴。在者惟芷塘。德麟肝膽對之豁。歲暮始來京。遇師云在浙。今得臨安書。念舊言矻矻。讀能望西山。惟見飛鳥滅。側身天南雲。碧峯高突兀。

